

山西通志

册三十九

山西通志卷第二百二十一

山西巡撫都察院右副都御史

賈覺羅石麟奉

旨修輯

藝文 四十 詩一

四言古

陶唐

康衢謠

列子曰堯治天下五十年不知天下治與不治與億兆願戴已與乃微服遊于康衢聞童兒謠堯喜問曰誰教爾為此言童兒曰聞之大夫大夫曰古詩也立我烝民莫匪爾極不識不知順帝之則

擊壤歌

山西通志 卷一百二十一
日出而作日入而息鑿井而飲耕田而食帝力於我何有哉
立非堯戒 黃利 國 對 不 痛 不 時 帝 帝 帝 帝

淮南子人間訓堯戒曰

戰戰慄慄日謹一日人莫躓於山而躓於堙

伊耆氏蜡辭

禮記郊特牲曰天子大蜡八伊耆氏始為蜡蜡也者索也

歲十二月合聚萬物而索饗之也

土反其宅水歸其壑昆蟲毋作草木歸其澤

虞

音 卿雲歌

樂府集載尚書大傳云舜將禪禹於是俊乂百工相和而
歌卿雲帝唱之八伯咸進稽首而和帝乃載歌

卿雲爛兮糺縵縵兮日月光華旦復旦兮

八伯歌

明明上天爛然星陳日月光華弘於一人

帝乃載歌

日月有常星辰有行四時順經萬姓允誠於予論樂配天之
靈遷於賢善莫不咸聽龔乎鼓之軒乎舞之菁華已竭褰裳
去之

南風歌

家語曰昔者舜彈五絃之琴造南風之詩樂書舜歌南風
而天下治太史曰南風者生長之音也舜樂好之樂與天
地同意得萬國之驩心故天下治也

南風之薰兮可以解吾民之愠兮南風之時兮可以阜吾民

之財兮

舜祠田辭

見文心雕龍

荷此長耜耕彼南畝四海俱有

箕山歌

許敬由

登彼箕山兮瞻望天下山川嶇崎萬物還普日月運照靡不
記觀游放其間何所却慮歎彼唐堯獨自愁苦勞心九州憂
勤后土謂予欽命傳禪易祖我樂何如蓋不眄顧河水流兮
緣高山甘瓠施兮葉綿蠻高林肅兮相錯連居此之處傲堯
周君

轡之柔矣

汲冢周書曰師曠見周太子晉歸太子賜乘車四馬曰太

師亦善御之對曰御吾未之學也王子曰汝不為夫詩因
述此詩以是御之

馬之剛矣轡之柔矣馬亦不剛轡亦不柔志氣庶庶取與不
疑

虞箴

左傳襄公四年魏莊子謂晉侯曰昔周辛甲之為太史命
百官箴王闕於虞人之箴曰

芒芒禹跡畫為九州經啟九道民有寢廟獸有茂草各有攸
處德用不擾在帝夷羿冒於原獸忘其國恤而思其麀牡武
不可重用不恢於夏家獸臣司原敢告僕夫

投壺辭

左傳昭公十二年晉侯以齊侯宴中行穆子相投壺晉侯

先穆子曰

有酒如淮有肉如坻寡君中此為諸侯師

齊侯舉矢曰

有酒如澠有肉如陵寡人中此與君代興

漢

郊祀歌

惟泰元尊媪神蕃釐

讀日嬉

經緯天地作成四時精建日月星

辰度理陰陽五行周而復始雲風雷電降甘露雨百姓蕃滋

咸循厥緒繼統共勤順皇之德鸞路龍鱗罔不盼飾嘉籟列

陳庶幾宴享滅除凶災烈騰八荒鍾鼓竿笙雲舞翔翔招搖

靈旗九夷賓將

魏

帝堯贊

曹植

火德統位父則高辛克平共工萬國同塵調適陰陽其惠如
春巍巍成功配天則神

晉

征西大將軍京陵王公會射堂皇太子見命作此詩六

章

陸雲

芒芒太極元化煙煴頽形成器凌象垂文大鈞造物庶類羣
分先識經始實綜彝倫

惟岳隆周生甫及申天監在晉祚之降神邈矣遐風茂德有

鄰永言配命唯晉之鎮

厥鎮伊何實幹心膂文教內輔武功外禦淮方未靖帝曰攸

序公于出征奄有南浦

山西通志 卷二百二十一 詩 四
南海既賓爰戢干戈桃林釋駕天馬婆娑象齒南金來格皇
家絕音協徽宇宙告和

元綱峻極天網既紘文武方升允茲兼弘峩峩高夏百肅其
涼公侯戾止駉驥龍驤善問如林在會鏘鏘祝融銜節火正
緝熙凱風徘徊萬物欣時秩秩初筵薄言在茲嘉福介祐萬
壽無期

贈溫嶠

郭璞

人亦有言松竹有林及爾臭味異荅同岑言以忘得交以淡
成同匪伊和惟我與生爾神余契我懷子情攜手一豁安知
塵冥

隋

宴秦孝王于并州作

文帝

紅顏詎幾玉貌須臾一朝花落白髮難除明年後歲誰有誰

唐無

祭汾陰樂章

唐書樂志曰明皇開元十一年祭皇地祇於汾陰迎神用順和八變皇帝行用太和

登歌奠玉用肅和迎俎用雍和酌獻飲福用壽和送文舞出迎武舞入用舒和武舞用凱安送神用順和

順和 林鐘宮黃門侍郎韓思復作

大樂和暢殷薦明神一降通感八變必臻有求斯應無德不
親降靈醉止休徵一人

順和 太簇角中書侍郎盧從愿作

坤元載物陽樂發生播殖資始品彙咸亨列俎棋布方壇砥
平神歆禋祀后德惟明

大晉出順和

姑洗徵司勳郎中劉晃作

大君出震有事郊禋齊戒既肅馨香畢陳樂和禮備候暖風
春恭惟降福實賴明神

順和
南呂羽 禮部侍郎韓休作

於穆濬哲維清緝熙肅事昭配永言孝思滌濯靜嘉馨香在
茲神之聽之用受福釐

太和
吏部尚書王峻作

於穆聖皇六葉重光太原刻頌后土疏場寶鼎呈符歆雲孕
祥禮樂備矣降福穰穰

肅和
刑部侍郎崔元童作

聿修嚴配展事禋宗祥符寶鼎禮備黃琮祀詞以信明德惟
聰介茲景福永永無窮

雍和
徐州刺史賈會作

蠲我餼餼絜我膋薌有豆孔碩為羞既臧至誠無昧精意惟

芳神其醉止欣欣樂康

壽和
禮部尚書蘇頲作

禮物斯具一作備樂章乃陳誰其作主皇考聖真對越在天聖
明佐神宵然汾上厚澤如春

舒和
太常少卿何鸞作

樂奏云闕禮章載虔禋宗於地昭假於天惟馨薦矣既醉歆
焉神之降福永永萬年

凱安
王爵郎中蔣挺作

維歲之吉維辰之良聖君紱冕肅事壇場大禮已備大樂斯
章神聽醉止降福無疆

式
尚書右丞源光裕作

方邱既膳嘉饗載謚齋敬畢誠陶匏貴質秀畢一作豐薦芳

一作俎盈實永永福流其昇如日

咸池

元結

咸池陶唐氏之樂歌也其義蓋稱堯德至大無不備全凡

二章章四句

元化油油兮孰知其然至德汨汨兮順之以先

元化泥泥兮孰知其然至道泱泱兮由之以全

唐師起晉陽平姦豪為生人義主以仁興武為晉陽武

第一附

柳宗元

晉陽武奮義威煬之渝德焉歸氓畢屠綏者誰皇烈烈專天

機號以仁揚其旗日之昇九土晞訴由圻流洪輝有其二翼

餘隋斲梟驚連熊螭枯以肉勅者羸后土蕩元穹彌合之育

莽然施惟德輔慶無期

右晉陽武二十六句句三字

皇武命丞相度董師集大功也

皇耆其武于澱于淮既巾乃車環蔡具來狡衆昏囂甚毒于

醒狂奔叫呶以干大刑

皇咨于度惟汝一德曠誅四紀其後汝克錫汝斧鉞其往視

師師是蔡人以宥以釐

度拜稽首廟于元龜既禡既類于社是宜金節煌煌錫盾雕

戈犀甲熊旂威命是荷

度拜稽首出次于東天子餞之罍斝是崇鼎臠俎載五獻百

籩凡百卿士班以周旋

既涉于澹乃翼乃前孰圖厥猶其佐多賢宛宛周道于山于

川遠揚邇昭陟降連連

山西通志 卷三十一 藝文
我旆我旗于道于陌訓于羣帥拳勇來格公曰徐之無恃額
額式和爾容惟義之宅
進次于郟彼昏卒狂哀兇鞠頑鋒蝟斧塘赤子匍匐厥父是
亢怒其萌芽以悖太陽
王旅渾渾是佚是怙旣獲敵師若飢得舖蔡兇伊窘悉起來
聚左擣其虛靡愆厥慮
載闢載被丞相是臨弛其武刑諭我德心其危旣安有長如
林曾是謹諂化爲謳吟
皇曰來歸汝復相子爵之成國胙以夏區度拜稽首天子聖
神度拜稽首皇祐下人
淮夷旣平震是朔南宜廟宜郊以告德音歸牛休馬豐稼于
埜我武惟皇永保無疆

右皇武十有一章章八句

堯銘

貫休

金冊昭昭列聖孤標仲尼有言巍巍帝堯承天眷命罔厥矜
驕四德炎炎堦堦不凋永孚於休垂衣飄飄吾皇則之小心
翼翼秉陽亭毒不遑暇食土堦苔綠茅茨雪滴君旣天賦相
亦天錫德軒金鏡以聖繼聖漢高將將太宗兵柄吾皇則之
日新德盛朽索六馬罔墜厥命熙熙蓼蕭塊潤風調舞擊干
羽囿入芻蕘旣玉其葉亦金其枝葉葉枝枝百工允釐享國
如堯不疑不疑

舜頌

高高歷山有黍有粟皇皇大舜合堯元德五典克從四門伊
穆大道將行天下爲公臨下有赫選賢用能吾皇則之無斃

無逸綏厥品彙光光得一千輻臨頂十載隨蹕大哉大同為
光為龍吾皇則之聖謀隆隆納隍孜孜切切六宗是禋
五瑞斯列排麟環鳳披香立雪四夷納賚九圍有截昔救世
師降生竺乾壽春亦然萬年萬年

後唐宗廟樂舞辭

唐餘錄曰後唐並用唐樂無所變更
惟別造六室舞辭懿祖室奏昭德之
舞獻祖室奏文明之舞太祖室奏應天之舞昭宗室
奏永平之舞莊宗室奏武成之舞明宗室奏雍熙之
舞

昭德舞

懿彼明德赫赫煌煌名高閩域功著旂常道符休泰運叶祺
祥慶傳萬祀以播耿光

文明舞

帝業光揚皇圖翕赫聖德孔彰神功不測信及豚魚恩霑動

植懿範鴻名傳之萬億

應天舞

晉國肇興雄圖再固黼黻帝道金玉王度皇天無親惟德是
輔載誕英明永光聖祚

永平舞

慶傳瓚祚位正瑤圖功宣四海化被八區靜彰帝道動合乾
符千秋萬祀永荷昭蘇

武成舞

艱難王業返正皇唐先天再造却日重光漢紹世祖夏資少
康功成德茂率祀無疆

雍熙舞

仁君御宇寰海謐清運符武德道協文明九成式叙百度惟

山西通志 卷三十一 一
貞金門積慶玉葉傳榮

元

蘇天爵 蘇天爵詩 并序

河東李生僑家正定築室以奉其母揭名鶴壽為之賦詩
奕奕新堂滹水之陽于以奉母允壽且康惟此滹陽風物淳
美旨甘膳羞亦孔之備母氏壽康由克致養子職慎修晨夕
弗爽九皋之禽其色尚元爰祝慈母惟以永年瞻彼冀方俗
儉而嗇我固不怠昊天罔極生也屬屬肄業詩書堂構益崇
其永勿墮

明

平陸渡陝 附

張四維

遊子驅車越陝關河四顧茫然柳外漢唐馳道草間虞芮閑

田虎踞地雄百二雞鳴客度三千往事幾遷陵谷水聲依舊
潺湲

有因母而廢其子者嗟嗟失犁牛之旨矣因為是詩

魏允貞

有芝草兮生於腐株腐株可憎兮芝草不可無
有醴泉兮出於濁泥濁泥可憎兮醴泉不可遺

採鹽八章章四句

兩州十縣鹽丁萬餘夏王六月臨池吁且
臨池吁且炎暑熏灼且勤且懼手足俱剝
手足俱剝亦既勞止載饑載渴亦既病止
亦既病止公事靡盬彼此相念豈敢辭苦
豈敢辭苦不日不月豈不懷歸憲法明切

山西通志 卷三十一 藝文
憲法明切無敢離伍陟彼條山瞻望父母
瞻望父母誰共饗飧弱婦稚子憂心如醺
憂心如醺何云歸哉我心悲傷莫知我哀

享滂河龍神辭

邢雲路

二氣赫戲飛龍在天靈洞元化德浹淵泉效仁合義介福在
焉睠我毗庶惠我原田陽侯典澤畢野流川不雲而雨盈陌
溢阡我稼既同登於百年民知報事敢替乾乾燔蕭薦鬯以
達精虔樂動太和神應罔愆函蒙釐祉永世綿綿

國朝

女媧廟三章

魏象樞

維天清虛維石頑冥煉補而後孰辨厥形
天可問乎不得其門如何未補仰之可捫

五色既成渾圓無漏西北不完伊誰之咎

五言古詩

魏

苦寒行

武帝

北上太行山艱哉何崔巍羊腸坂詰屈車輪爲之摧樹木何
蕭瑟北風聲正悲熊羆對我蹲虎豹夾路啼谿谷少人民雪
落何霏霏延頸長歎息遠行多所懷我心何怫鬱思欲一東
歸水深橋梁絕中路正徘徊迷惑失故路薄暮無宿棲行行
日已遠人馬同時飢擔囊行取薪斧水持作糜悲彼東山詩
悠悠使我哀

晉宋四奏出

古唐堯

傅元

古務成行古曲亡古今樂錄曰唐堯言聖皇陟帝位德化
晉光四表也

唐堯諮務成謙謙德所興積漸終光大履霜致堅冰神明道
自然河海猶可凝舜禹統百揆元凱以次升禪讓應天曆睿
聖世相承我皇陟帝位平衡正準繩德化飛四表祥氣見其
徵興王坐俟旦亾主恬自矜致遠由近始覆篲成山陵披圖
按先籍有其證靈液

王明君辭

石崇

王明君者本是王昭君曰觸文帝諱改之匈奴盛請婚於
漢元帝曰後宮良家子昭君配焉昔公主嫁烏孫令琵琶
馬上作樂以慰其道路之思其送昭君亦必爾也其造新
曲多哀怨之聲故叙之於紙云爾

我本漢家子將適單于庭辭訣未及終前驅已抗旌僕御涕
流離轅馬悲且鳴哀鬱傷五內泣淚沾朱纓行行日已遠遂
造匈奴城延我於穹廬加我閼氏名殊類非所安雖貴非所
榮父子見陵辱對之慙且驚殺身良不易默默以苟生苟生
亦何聊積思常憤盈願假飛鴻翼乘之以遐征飛鴻不我顧
佇立以屏營昔爲匣中玉今爲糞上英朝華不足歡甘與秋
草并傳語後世人遠嫁難爲情

從幸洛水餞王公歸國詩

王浚

聖主應期運至德敷彝倫神道垂大教元化被無垠欽若崇
古制建侯屏四隣皇輿廻羽蓋高會洛水濱臨川講妙藝縱
酒釣潛鱗八音以迭奏蘭羞備時珍古人亦有言爲國不患
貧與蒙廟庭施幸得厠大鈞羣僚荷恩澤朱顏感獻春賦詩

山西通志 卷二百二十一
盡下情至感暢人神長流無舍逝白日入西津奉辭慕華輦
侍衛路無因馳情繫帷幄乃心戀軌塵

古詩 遊仙詩十四首

姑射山賦

郭璞

京華游俠窟山林隱遯棲朱門何足榮未若託蓬萊臨源挹
清波陵崗掇丹萸靈谿可潛盤安事登雲梯漆園有傲吏萊
氏有逸妻進則保龍見退爲觸藩羝高蹈風塵外長揖謝夷
齊

青溪千餘仞中有一道士雲生梁棟間風出牕戶裏借問此
爲誰云是鬼谷子翹迹企頽陽臨河思洗耳聞闔西南來潛
波渙鱗起靈妃顧我笑粲然啟玉齒蹇修時不存要之將誰
使

翡翠戲蘭苕容色更相鮮綠蘿結高林蒙籠蓋一山中有冥

寂士靜嘯撫清絃放情凌霄外嚙菜挹飛泉赤松臨上游駕
鴻乘紫烟左挹浮邱袖右拍洪崖肩借問蜉蝣輩寧知龜鶴
年

六龍安可頓運流有代謝時變感人思已秋復願夏淮海變
微禽吾生獨不化雖欲騰丹谿雲螭非我駕愧無魯陽德廻
日向三舍臨川哀年邁撫心獨悲吒

逸翮思拂霄迅足羨遠游清源無增瀾安得運吞舟珪璋雖
特達明月難闇投潛穎怨清陽陵茗哀素秋悲來惻丹心零
淚緣纓流

雜縣寓魯門風煖將爲災吞舟涌海底高浪駕蓬萊神仙排
雲出但見金銀臺陵陽挹丹溜容成揮玉杯姮娥揚妙音洪
崖頷其頤升降隨長烟飄飄戲九垓奇齡邁五龍千歲方嬰

山西通志 卷三十一 藝文 三
孩燕昭無靈氣漢武非仙才
晦朔如循環月盈已復魄
暮收清西陸朱羲將由白
寒露拂陵茗女蘿辭松柏
薜榮不終朝蜉蝣豈見夕
圓邱有奇草鐘山出靈液
王孫列八珍安期鍊五石
長揖當途人去來山林
客散四門日
暘谷吐靈曜扶桑森千丈
朱霞升東山朝日何晃朗
迴風流曲櫺幽室發逸響
悠然心永懷眇爾自遐想
仰思舉雲翼延首矯玉掌
嘯傲遺世羅縱情在獨往
明道雖若昧其中有妙象
希賢宜勵德羨魚當結網
採藥遊名山將以救年頽
呼吸玉滋液妙氣盈胸懷
登仙撫龍駟迅駕乘奔雷
鱗裳逐電曜雲蓋隨風迴
手頓羲和轡足蹈閭闔開
東海猶蹄涔昆崙螻蟻堆
遐邇冥茫中俯視令人

哀

璇臺冠崑嶺西海濱招搖瓊林籠藻映碧樹疏英翹丹泉漂
朱沫黑水鼓元濤尋仙萬餘日今乃見子喬振髮晞翠霞解
褐被絳綃總轡臨少廣盤虬舞雲輶永偕帝鄉侶千齡共道
遙

登岳採五芝涉澗將六草散髮蕩元溜終年不華皓
四瀆流如淚五岳羅若垤尋我青雲友永與時人絕
靜歎亦何念悲此妙齡逝在世無千月命如秋葉蒂蘭生蓬
芭間榮曜常幽翳
縱酒濛汜濱結駕尋木末翹手攀金梯飛步登玉闕左顧擁
方目右眷極朱髮

萬國唐虞世道治

附

嵇康

萬國穆清無事賢愚各自得志晏然逸豫內忘佳哉爾時可
喜

蒲坂行

劉遵

漢使出蒲坂去去往交河間謀敢虧對驂馬脫鳴珂乍作渡
瀘怨何辭上隴歌

宋

擬古

鮑照

幽并重騎射少年好馳逐羶帶佩雙鞬象弧插彫服獸肥春
草短飛鞚越平陸朝遊鴈門上暮還樓煩宿石梁有餘勁驚
雀無全目漢虜方未和邊城屢翻覆留我一白羽將以分符
竹

齊

蒲坂行

陸厥

江南風已春河間柳已把雁反無南書寸心何由寫流泊祁
連山飄颻高闕下

梁

昭君辭

沈約

朝發披香殿夕濟汾陰河於茲懷九逝自此斂雙蛾沾粧疑
湛露繞臆狀流波日見奔沙起稍覺轉蓬多朔風犯肌膚非
直傷綺羅銜涕試南望關山鬱嗟峨始作陽春曲終成苦寒
歌唯有三五夜明月暫經過

詠霍將軍北伐

虞羲

擁旄爲漢將汗馬出長城長城地勢險萬里與雲平涼秋八
九月鐵騎入幽并飛狐白日晚澣海愁雲生羽書時斷絕刁

斗晝夜驚乘墉揮寶劍蔽日引高旌雲屯七萃士魚麗六郡
兵哀笳闕下思羌笛隴頭鳴骨都先自誓日逐次亡精玉門
罷斥埃甲第始修營位登萬庾積功立百行成天長地自久
人道有虧盈未窮激楚樂已見高臺傾當令麟閣上千載有
雄名

東南射山

王筠

阮籍詠懷詩曰東南有射山汾水出其陽言神仙之事
還丹改容質握髓駐流年口含千里霧掌流五色烟瓊漿汎
金鼎瑤池漑玉田倏忽整龍駕相遇鳳臺前

贈吳均

柳惲

夕宿飛狐關晨登磧磔坂形爲戎馬倦思逐征旗遠邊城秋
霰來寒鄉春風晚始信隴雪輕漸覺寒雲卷徭役命所當念

子加食飯

荅柳惲

吳均

清晨發隴西日暮飛狐谷秋月照層嶺寒風掃高木霧露夜
侵衣關山曉催軸君去欲何之參差間原陸一見終無緣懷
悲空滿目

郭弘農璞遊仙

江淹

崦山多靈草海濱饒竒石偃蹇尋青雲隱淪駐精魄道人讀
丹經方士煉玉液朱霞入牕牖曜靈照空隙傲睨摘木芝陵
波採水碧眇然萬里遊矯掌望烟客永得安期術豈愁濛汜

迫

北魏

應制賦銅鞮山松

彭城王勰

北史曰總從孝文帝幸代都次于上黨之銅鞮山路傍有
北大松樹十數株帝賦詩示總曰吾作詩雖不七步亦不言
賦遠汝可作之比至吾間令就也總時去帝十步且行且作
未至帝所而就

問松林松林經幾冬山川何如昔風雲與古同

隋

昭君詞

薛道衡

我本良家子充選入椒庭不蒙女史進更失畫師情蛾眉非
本質蟬鬢改真形專由妾命薄誤使君恩輕啼霑渭橋路歎
別長安城夜依寒草宿朝逐轉蓬征卻望關山迥前瞻沙漠
平朔風帶秋月嘶馬雜笳聲毛裘易羅綺氈帳代金屏自知
蓮臉歇羞看菱鏡明釵落終應棄髻解不須縈何用單于重
雲生漢宮如有憶爲視旄頭星

唐

過晉陽宮

元宗

緬想封唐處實惟建國初俯察伊晉野仰觀乃參虛井邑龍
斯躍城池鳳翔餘林塘猶沛澤臺榭宛舊居運革祚中否時
遷命茲符顧循承丕構怵惕多憂虞尚恐威不逮復慮化未
孚豈徒勞轍迹所期訓戎車習俗問黎人親巡慰里閭永言
念成功頌德臨康衢長懷經綸日歎息履庭隅艱難安可忘
欲去良踟躕

汾陰后土祠作

李適

昔予讀舊史徧覩漢世君武皇實稽古建茲百代勳號今垂

懋典舊經備闕文南巡歷九疑舳艫被江濱勒兵十八萬旌
旗何紛紛竭來茂陵下英聲不復聞我行歲方晏極望山河
分神光終冥漠鼎氣獨氛氲攬涕步睚上登高見彼汾雄圖
今安在飛飛有白雲

登澤州城北樓

陳子昂

平生倦游者觀化久無窮復來登此國臨眺與君同坐見秦
兵壘遙聞趙將雄武安君何在長平事已空且歌元雲曲御
酒舞薰風勿使青矜子嗟爾白頭翁

和崔日用遊開化寺

吳少微

左憲多才雄故人尤鷲鸚護贈單于使休軺太原郭館次厭
煩歎清懷尋寂寞西緣十里餘北上開化閣初入雲樹間冥
濛未昭廓漸出欄楯外萬里秋景焯歲晏風落山天寒水歸

壑覽物頌幽景三乘動禪鑰但敷利解言永用忘昏著

龍門山

沈佺期

龍山非禹鑿詭怪乃天功西南出巴峽不與衆山同長竇亘
五里宛轉復嵌空伏湍响潛石瀑水生輪風流水無晝夜噴
薄龍門中潭河勢不測藻葩乘彩虹我行當季月烟景共春
融江關勤亦甚巘嶠意難窮誓將息機事煉藥此山東

瓜園詩

并序

王維

維瓜園高齋俯視南山形勝二三時輩同賦是詩兼命詞
英數公同用園字爲韻韻任多少時太子司議郎薛璩發

此題遂同諸公云

余適欲鋤瓜倚鋤聽叩門鳴騶導驄馬常從來朱軒窮巷正
傳呼故人儻相存攜手追涼風放心望乾坤藹藹帝王州宮

山西通志 卷三十一
觀一何繇林端出綺道殿頂搖華幡素懷在青山若直白雲
屯回風城西雨返景原上村前酌盈尊酒往往聞清言黃鸝
嚙深木朱槿照中園猶羨松下客石上聞清猿

英還舊業

謝病始告歸依依入桑梓家人皆佇立相俟柴門裏時輩皆
長年成人舊童子上堂家慶畢願與姻親齒論舊忽餘悲日
存且相喜田園轉蕪沒但有寒泉水衰柳日蕭條秋光清邑
里入門乍如昨休騎非便止中飯顧王程離憂從如此

結定襄郡獄效陶

崔顥

我在河東時使往定襄里定襄諸小兒爭訟紛城市長老莫
敢言太守不能理謗書盈几案文墨相填委牽引肆中翁追
呼田家子我來折此獄五聽辨疑似小大必以情未嘗施鞭

箠是時三月暮遍野農桑起里巷鳴春鳩田園引流水此鄉
多雜俗戎夏殊音旨顧問邊塞人勞情曷云已

謁張果先生

李頎

先生谷神者甲子焉能計自說軒轅師於今幾千歲寓游城
郭裏浪迹希夷際應物雲無心逢時舟不繫餐霞斷火粒野
服兼荷製白雪淨肌膚青松養身世韜精殊豹隱鍊骨同蟬
蛻忽去不知誰偶來寧有契二儀齊壽考六合隨休憩彭聃
猶嬰孩松期且微細嘗聞穆天子更憶漢皇帝親屈萬乘尊
將窮四海裔車徒徧草木錦帛招談說八駿空往還三山轉
虧蔽吾君感至德元老欣來詣受籙金殿開清齋玉堂閉笙
歌迎拜首羽帳崇嚴衛禁柳垂香鑪宮花拂仙袂祈年寶祚
廣致福蒼生惠何必待龍髯鼎成方取濟

實庭謁夷齊廟
古人已不見喬木竟誰過寂寞首陽山白雲空復多蒼苔歸地骨皓首採薇歌畢命無怨色成仁其若何我來入遺廟時候微清和落日弔山鬼回風吹女蘿石門正西豁引領望黃河千里一飛鳥孤光東逝波驅車層城路惆悵此巖阿
奉和韋判官獻侍郎叔除河東採訪使
儲光羲
天卿小冢宰道大名亦大醜正在權臣建旗千里外楚山俯江漢沐水連譙沛兩持方伯珪再轉諸侯蓋恬淡輕黜陟優游邈千載乾象變台衡羣賢盡交泰聿徠股肱郡河嶽卽襟帶盛德滋冀方仁風清汾澮四封盡高足相府輶車最超超青雲器婉婉竹林會賤士敢知言成頌文明代燕雀依大厦期之保貞悔

淇上酬薛璩兼寄郭微

王昌齡

自從別京華我心乃蕭索十年守章句萬里空寥落北上登薊門茫茫見沙漠倚劍對風塵慨然思衛霍拂衣去燕趙驅馬悵不樂天長滄洲路日暮邯鄲郭酒肆或淹留魚澤屢棲泊獨行備艱難孰辭干鼎鑊皇情念淳古時俗何浮薄理道須任賢安人在求瘼故交負奇才逸氣包謬諤隱軫經濟策縱橫建安作才望忽先鳴風期無宿諾飄飄勞州縣迢遞限言謔東馳眇具邱西顧彌號略淇水徒自深浮雲不堪託吾謀適可用天道豈遼廓不然買山田一身與耕鑿

中丞昭君墓

常建

漢宮豈不死異域傷獨沒萬里馱黃金蛾眉為枯骨迴車夜出塞立馬皆不發共恨丹青人墳上哭明月

山西通志 卷二百二十一 藝文 出塞太行苦熱行

劉長卿

迢迢太行路自古稱險惡千騎儼欲前羣峰望如削火雲從
中起仰視飛鳥落汗馬臥高原危旌倚長薄清風何不至赤
日方煎爍石露山木焦鱗窮水泉涸九重今旰食萬里傳明
略諸將候軒車元凶愁鼎鑊何勞短兵接自有長纓縛通越
事豈難渡瀘功未博朝辭羊腸坂夕望具邱郭漳水斜遶營
常山遙入幕永懷姑蘇下因寄建安作白雪和難成滄波意
空託陳琳書記好王粲從軍樂早晚歸漢庭隨公上麟閣

送祁樂歸河東

岑參

祁樂後來秀挺身出河東往年詣驪山獻賦溫泉宮天子不
召見揮鞭遂從戎前月還長安囊中金已空有時忽乘興畫
出江山峰牀頭蒼梧雲簾下天台松忽如高堂上颯颯生清
風五月火雲屯氣燒天地紅鳥且不敢飛子行如轉蓬少華
與首陽隔河勢爭雄新月河上出清光滿關中置酒灞亭別
高歌披心胸君到故山時爲謝五老翁

送薛弁歸河東

薛侯故鄉處五老峰西頭歸路秦樹滅到鄉河水流看君馬
首去滿耳蟬聲愁獻賦今未售讀書凡幾秋應過伯夷廟爲
上關城樓樓上能相憶西南指雍州

南池夜宿思王屋青蘿舊齋

池上臥煩暑不櫛復不巾有時清風來自謂羲皇人天晴雲
歸盡雨洗月色新公事常不閑道書日生塵早年家王屋五
別青蘿春安得還舊山東谿垂釣綸

精衛

山西通志

卷二百二十一 藝文

七

山西通志 卷三百二十一 藝文 三
負劍出北門乘桴適東溟一鳥海上飛云是帝女靈玉顏溺
水死精衛空爲名怨積徒有志力微竟不成西山木石盡巨
壑何時平

送王屋山人魏萬還王屋

并序

李白詩

王屋山人魏萬云自嵩宋沿吳相訪數千里不遇乘興遊
台越經永嘉觀謝公石門後於廣陵相見美其愛文好古
浪跡方外因述其行而贈是詩

僊人東方生浩蕩弄雲海沛然乘天遊獨往失所在魏侯繼
大名本家聊攝城卷舒入元化跡與古賢并十三弄文史揮
筆如振綺辨折田巴生心齊魯連子西涉清洛源頗驚人世
喧采秀臥王屋因窺洞天門竭來遊嵩峰羽客何雙雙朝攜
月光子暮宿玉女牕鬼谷上窈窕龍潭下奔淥東浮汴河水

訪我三千里逸興滿吳雲飄颻淝江汜揮手杭越間樟亭望
湖還濤卷海門石雲橫天際山白馬走素車雷奔駭心顏遙
聞會稽美且度耶溪水萬壑與千巖崢嶸鏡湖裏秀色不可
名清輝滿江城人遊月邊去舟在空中行此中久延佇入剡
尋王許笑讀曹娥碑沈吟黃絹語天台連四明日入向國清
五峰轉月色百里行松聲靈溪谷沿越華頂殊超忽石梁橫
青天側足履半月忽然思永嘉不憚海路賒挂席歷海嶠廻
瞻赤城霞赤城漸微沒孤嶼前曉兀水續萬古流亭空千霜
月縉雲川谷難石門最可觀瀑布挂北斗莫窮此水端噴壁
灑素雪空濛生晝寒却思惡溪去寧懼惡溪惡咆哮七十灘
水石相噴薄路創李北海巖開謝康樂松風和猿聲搜索連
洞壑徑出梅花橋雙溪納歸潮落帆金華岸赤松若可招沈

山西通志 卷二百二十一
約八詠樓城西孤岩嶢峩嶢四荒外曠望羣川會雲卷天地
開波連浙西大亂流新安口北指巖光瀨釣臺碧雲中邈與
蒼嶺對稍稍來吳都裴回上姑蘇烟綿橫九疑漭蕩見五湖
目極心更遠悲歌但長吁迴橈楚江濱揮策揚子津身著日
本裘昂藏出風塵五月造我語知非佞人相逢樂無限水
石日在眼徒干五諸侯不致百金產吾友揚子雲弦歌播清
芬雖爲江寧宰好與山公羣乘興但一行且知我愛君君來
幾何時僊臺應有期東牕綠玉樹定長三五枝至今天壇人
當笑爾歸遲我苦惜遠別茫然使心悲黃河若不斷白首長
相思

狄梁公

高適

梁公乃貞固勲烈垂竹帛昌言太后朝潛運儲君策待賢開
相府其理登方伯至今青雲人猶是門下客

奉和李大夫同呂評事太行苦熱行兼寄院中諸公

獨孤及

駟馬上太行修途亘遼碣王程無留駕日昃未遑歇請問此
何時恢台朱明月長虵稽天討上將方北伐明主命使臣皇
華得時傑已忘羊腸險豈憚濕風熱搖策汗滂滄登岸思紆
結炎雲如烟火谿谷將恐竭晝景艷可畏涼飈何由發山長
飛鳥墮目極行車絕趙魏方俶擾安危俟明哲歸路豈不懷
飲水有苦節會同傳檄至疑議立談決况有阮元瑜翩翩秉
書札起予歌赤坂永好踰白雪誰念剖竹人無因執羈紲

關雲長祠送高員外還荊州

郎士元

將軍稟天姿義勇冠今昔走馬百戰場一劔萬人敵雖爲感

恩者竟是思歸客流落荆巫間裴回故鄉隔離筵對祠宇灑
酒暮天碧去去勿復言銜悲向陳跡

宋氏五女

王建

貝州宋處士若芬五女若華若昭若倫若憲若茵
五女誓終養貞孝內自持免絲自縈紆不上青松枝晨昏在
親傍閒則讀書詩自得聖人心不因儒者知少年絕音華貴
絕父母詞素釵垂兩髦短窄古時衣行成聞四方徵詔環佩
隨同時入皇宮聯影步玉墀鄉中尙其風重爲修茅茨聖朝
有良史將此爲女師

送侯參謀赴河中幕

韓愈

憶昔初及第各以少年稱君頤始生鬚我齒清如水爾時心
氣壯百事謂已能一別詎幾何忽如隔晨興我齒豁可鄙君

顏老可憎相逢風塵中相視迭嗟矜幸同學省官末路再得
朋東司絕教授遊晏以爲恒秋漁蔭密樹夜博然明燈雪逕
抵樵叟風廊折談僧陸渾桃花間有湯沸如烝三月崧少步
躑躅紅千層洲沙厭晚坐嶺壁窮晨升沈冥不計日爲樂不
可勝遷滿一已異乖離坐難憑行行事結束人馬何躑騰感
激生膽勇從軍豈嘗曾沈沈司徒公天子爪與肱提師十萬
餘四海欽風稜河北兵未進蔡州帥新薨曷不請掃除活彼
黎與蒸鄙夫誠怯弱受恩媿徒弘猶思脫儒冠棄死取先登
又欲面言事上書求詔徵侵官固非是妄作譴可懲惟當待
責免耕斲歸溝塍今君得所附勢若脫鞴鷹檄筆無與讓幕
謀職其膺收績開史牒翰飛逐溟鵬男兒貴立事流景不可
乘歲老陰沴作雲頽雪翻崩別袖拂洛水征車轉峻陵勤勤

山西通志 卷三十一 詩
酒不進勉勉恨已仍送君出門歸愁腸若牽繩默坐念語笑
癡如遇寒蠅策馬誰可適晤言誰爲應席塵惜不掃殘尊對
空疑信知後會時日月屢環絙生期理行役歡緒絕難承寄
書惟在頻無恡簡與繪

太原旅懷呈薛十八侍御齊十二奉禮 歐陽詹

前來稱英雋有食主人魚後來曰賢才又受主人車伊予亦
投刺恩煦胡凋疎旣覩主人面復見主人書餬口百家周賃
廡三月餘眼見寒序臻坐送秋光除西日怒飢腸北風疾絺
裾升堂有知音此意當何如

初發太原途中寄太原所思

驅馬覺漸遠迴頭長路塵高城已不見况復城中人去意自
未甘居情諒猶辛五原東北晉千里西南秦一履不出門一

車無停輪流萍與繫匏早晚期相親

客有爲余話登天壇遇雨之狀因以賦之

劉禹錫

清晨登天壇半路遇陰晦疾行穿雨過却立視雲背白日照
其上風雷走於內滉漾雪海翻槎牙玉山碎蛟龍露鬚鬣神
鬼含變態萬狀互生滅百音以繁會俯觀羣動靜始覺天宇
大山頂自晶明人間已霽霈豁然重昏斂渙若春冰潰反照
入松門瀑流飛縞帶遙光泛物色餘韻吟天籟洞府撞仙鐘
村墟起夕靄却見山下侶已如迷世代問我何處來我來雲
雨外

游石龍渦

孟郊

石龍不見形石雨如散星山下晴皎皎山中陰泠泠水飛林

木杪珠綴莓苔屏，畜異物皆別。當晨景欲暝，泉芳春氣碧。松
月寒色青，險力此獨壯。猛獸亦不停，日莫且回去。浮心恨未
寧。

董公詩

張籍

誰主東諸侯，元臣隴西公。旌節居汴水，四方皆承風。在朝四
十年，天下誦其功。相我明天子，政成如太宗。東方有艱難，公
乃出臨戎。單車入危城，慈惠安羣兇。公謂其黨言，汝材甚驍
雄。爲我帳下士，出入衛我躬。汝息爲我子，汝親爲我翁。衆皆
相顧泣，無不和。且恭其父教，子義其妻。勉夫忠不自以爲資，
奉上但顛顛。公衣無文采，公食少肥濃。所憂在萬人人，實我
寧。公輕刑寬其政，薄賦弛租庸。四郡三十城，不知歲飢凶。天
子臨朝喜，元老留在東。今聞揚盛德，就安我大邦。百辟賀明

主皇風恩賜重，朝廷有大事就決其所從。海內旣無虞，君臣
方肅雍。端居任僚屬，宴語常從容。翩翩者蒼鳥，來巢於林叢。
甘瓜生場圃，一帶實連中。田有嘉穀隴，異畝穗亦同。賢人佐
聖人，德與神明通。感應我淳化，生瑞我地中。昔者此州人，但
矜馬與弓。今公施德禮，自然威武崇。公其其百年受祿，將無
窮。

七月一日曉入太行山

李賀

一夕遶山秋，香露溘蒙蒙。新橋倚雲阪，候蟲新露撲。洛陽今
已遠，越衾誰爲熟。石氣何淒淒，老莎如短鋸。

初入太行路

白居易

天冷日不光，太行峰蒼莽。嘗聞此中險，今我方獨往。馬蹄凍
且滑，羊腸不可上。若比世路難，猶自平於掌。

且嘗早冬遊王屋自靈都抵陽臺上方望天壇偶吟成章寄
天合口溫谷周尊師中書李相公

霜降山水清王屋十月時石泉碧漾漾巖樹紅離離朝為靈
都遊暮有陽臺期飄然世塵外鸞鶴如可追忽念公程盡復
慙身力衰天壇在天半欲上心遲遲嘗聞此遊者隱客與損
之客抱貴仙骨俱非泥垢姿二人相顧言彼此稱男兒若不
為松喬即須作臯夔今果如其語光彩雙葳蕤一人佩金印
一人翳玉芝我來高其事詠歎偶成詩為君題石上欲使故
山知

閑題家池寄王屋張道士

有石白磷磷有水清潺潺有叟頭似雪婆娑乎其間進不趨
要路退不入深山深山太濶落要路多險難不知家池上樂

逸無憂患有食適吾口有酒醅吾顏恍惚遊醉鄉希夷造元
關五千言下悟十二年來閑富者我不顧貴者我不攀唯有
天壇子時來一往還

題裴晉公女几山刻石詩後 并序

裴侍中晉公出討淮西時過女几山下刻石題詩末句云
待平賊壘報天子莫指仙山示武夫果如所言克期平賊
由是淮蔡迄今底寧殆二十年人安生業夫嗟歎不足則
詠歌之故居易作詩二百言繼題公之篇末欲使採詩者
修史者後之往來觀者知公之功德本末前後也

何處畫功業何處題詩篇麒麟高閣上女几小山前爾後多
少時四朝二十年賊骨化為土賊壘犁為田一從賊壘平陳
蔡民晏然驟軍成牛戶鬼火變人烟生子已嫁娶種桑亦絲

山西通志 卷二百二十一
三
縣皆云公之德欲報無由緣公今在何處守都鎮三川舊宅
留永樂新居開集賢公今在何官被袞珥貂蟬戰袍破猶在
髀肉生欲圓襟懷轉蕭灑氣力彌精堅登山不拄杖上馬能
掉鞭利澤浸入池福降昇自天昔號天下將今稱地上仙勿
追赤松遊勿拍洪崖肩商山有遺老可以奉周旋

青冢

上有饑鷹號下有枯蓬走茫茫邊雪裏一掬沙培塿傳是昭
君墓埋閉蛾眉久凝脂化爲泥鉛黛復何有唯有陰怨氣時
生墳左右鬱鬱如苦霧不隨骨銷朽婦人無他才榮枯繫妍
否何乃明妃命獨懸畫工手丹青一註誤白黑相紛糾遂使
君眼中西施作嫫母同儕傾寵幸異類爲配偶禍福安可知
美顏不如醜何言一時事可戒千年後特報後來姝不須倚

眉首無辭插荆釵嫁作貧家婦不見青塚上行人爲澆酒

詠歐陽行周事

并序

孟簡

閩越之英惟歐陽生以能文擢第爰始一命食太學之祿
助成均之教有庸績矣我唐貞元年己卯歲曾獻書相府
論大事風韻清雅詞旨切直會東方軍興府縣未暇慰薦
久之倦遊太原還來帝京卒官靈臺悲夫生于單貧以徇
名故心專勤儉不識聲色及茲筮仕未知洞房織腰之爲
蠱惑初抵太原居大將軍宴席上有妓北方之尤者屢目
于生生感悅之留賞累月以爲燕婉之樂盡在是矣旣而
南轅妓請同行生日十日所視不可不畏辭焉請待至都
而來迎許之乃去生竟以蹇運不克如約過期命甲遣乘
密往迎妓妓因積望成疾不可爲也先死之夕剪其雲髻

山西通志 卷三十一 藝文
謂侍兒曰所歡應訪我當以髻爲貺甲至得之以乘空歸授髻于生生爲之慟怨涉旬而生亦歿則韓退之作何蕃書所謂歐陽詹生者也河南穆元道訪予常歎息其事嗚呼鍾愛于男女素期效死夫亦不蔽也大凡以斷割不爲麗色所汨豈若是乎古樂府詩有華山畿玉臺新詠有廬江小吏相死或類于此暇日偶作詩以繼之云
有客西北逐驅馬次太原太原有佳人神艷照雲行座上轉橫波流光注夫君夫君意蕩漾卽日相交歡定情非一詞結念誓青山先死不變易中誠無間言此爲太學徒彼屬北府官中夜欲相從嚴城限軍門白日欲同居君畏仁人聞忽如隴頭水坐作東西分驚離腸干結滴淚眼雙昏本達京師廻賀期相追攀宿約始乖阻彼憂已纏綿高髻若黃鸝危鬢如

玉蟬纖手自整理剪刀斷其根柔情託侍兒爲我遺所歡所歡使者來侍兒因復前技淚取遺寄深誠祈爲傳封來贈君子願言慰窮泉使者廻復命遲遲蓄悲酸詹生喜言旋倒屣走迎門長跪聽未畢驚傷涕漣漣不飲亦不食哀心百千端襟情一夕空精爽旦日殘哀哉浩然氣潰散歸化元短生雖別離長夜無阻難雙魂終會合兩劍遂蜿蜒丈夫早通脫可笑安能干防身本苦節一去何由還後生莫沈迷沈迷喪其真

石佛谷

皇甫曙

漫漶太行北千里一塊石平腹有壑谷深廣數百尺土僧何爲者老草毛髮白寢處容身龕足膝隱成跡金仙琢靈像相好倚北壁花座五雲扶玉毫六虛射文人留紀述時事可辨

山西通志 卷三十一 一
析鳥趾巧均分龍骸極癯瘠枯松闌槎枿猛獸恣騰擲蝘
蟲食縱懸垂露凝滴精藝貫古今窮巖誰愛惜託師禪誦餘
勿使塵埃積

戲題樞言草閣三十二韻

李商隱

君家在河北我家在山西百歲本無業陰陰仙李枝尚書文
與武戰罷幕府開君從渭南至我自仙遊來平昔苦南北動
成雲雨乖逮今兩攜手對若牀下鞵夜歸碣石館朝上黃金
臺我有苦寒調君抱陽春才年顏各少壯髮綠齒尚齊我雖
不能飲君時醉如泥政靜籌畫簡退食多相攜埽掠走馬路
整動射雉翳春風二三月柳密鶯正啼清河在門外上與浮
雲齊歌冠調玉琴彈作松風哀又彈明君怨一去怨不回感
激坐者泣起視雁行低翻憂龍山雪却雜胡沙飛仲容銅琵琶

琵琶項直聲淒淒上貼金捍撥畫爲承露雞君時臥振觸勸客
白玉盃苦云年光疾不飲將安歸我賞此言是因循未能諧
君言中聖人坐臥莫我違榆莢亂不整楊花飛相隨上有白
日照下有東風吹青樓有美人顏色如玫瑰歌聲入青雲所
痛無良媒少年苦不久顧慕良難哉徒令真珠毗裏入珊瑚
腮君今且少安聽我苦吟詩古詩何人作老大徒傷悲

北嶽廟

賈島

天地有五嶽恒嶽居其北巖巒疊萬重詭怪浩難測人來不
敢入祠宇白日黑有時起霖雨一灑天地德神兮安在哉永
康我王國

送進士李殷下第遊汾河

曹鄴

上國花照地遣君向西征旁人亦有恨況復故人情單車欲

山西通志 卷三十一
云去別酒忽然醒如何今夜夢半作道路程邊士不好禮全家住軍城城中鼓角嚴旅客常夜驚中有左記室逢人眼光明西門未歸者下馬如到京還應一開卷爲子心不平慙慙說忠抱壯志勿自輕

富農詩

并序

于瀆

瀆寓居堯山南六十里里有富農得氏瑯琊人指其貌此多藏者也積粟萬庾馬牛無算血屬星居於里土生不遺死不贈環顧妻孥意與天地等故作是詩用廣知者長聞鄉人語此家勝良賈骨肉化飢魂倉中有飽鼠青春滿桑柘旦夕鳴機杼秋風一夜來累累聞砧杵西鄰有原憲蓬蒿遶環堵自樂固窮心天意在何處當門見稚子已作桑田主安得四海中盡爲虞芮土

經羊角哀墓

吳筠

祇召出江國路傍旌古墳伯桃葬角哀墓近荆將軍神道不相得稱兵解其紛幽明信難知勝負理莫分長呼遂刎頸此節古未聞兩賢結情愛骨肉何足云感子初併糧我心正氛氲遲迴駐征騎不覺空林醺

伯夷叔齊

夷齊互崇讓棄國從所欽聿來及宗周乃復非其心世濁不可處冰清首陽岑采薇詠義農高義越古今

五老峰大明觀贈隱者

姚係

雲觀此山北與君攜手稀林端涉橫水洞口入斜暉乍見鸞鶴邈忽爲煙霧飛故人清和客默會琴心微丹術幸可授青龍當未歸悠悠平生意此日復相違

送友下第遊雁門

劉駕

相別灞水湄，夾水柳依依。我願醉如死，不見君去時。所詣星斗北，直行到猶遲。况復挈空囊，求人悲路岐。北門記室賢，愛我學古詩。待君如待我，此事固不疑。雁門春色外，四月雁未歸。主人拂金臺，延客夜開扉。舒君鬱鬱懷，飲彼白玉卮。若不化女子，功名豈無期。

宋

寄題西京致仕張郎中靜居院

韓琦

院爲今之高平，靜居村郎中。名完有四堂，夷心會真清白。

金蘭

休官得晏閒，理固居處靜。中或不自達，觸物撓天性。遂令優游心，反致寂寞病。二川有耆英，識豈斯人並。周才當要職，美

譽著羣聽，氣體殊未衰。援禮請還政，安居得西歸。蕪沒治三徑，蕭然絕世行。日以道自勝，以靜名厥居。內外了相稱，君懷本清虛。復此林泉瑩，君道本和樂。况有琴尊冷，新堂闢四隅。立意尤高迥，夷襟造真境。友益具子令，藥品稽神仙。門法尚忠正，肌膚松菊香。庭砌芝蘭盛，天宜錫難老。以示君子慶，予亦希君者。誤寵竊機柄，無裨紫極尊。動亦赤松興，報國苟銜銖。竄身違陷阱，雅志吁未偕。高山徒景行。

觀德堂

李垂

園池氣象明，池沼春波平。東滙有朝勢，北源無滯聲。臨流好鼓瑟，待月堪浮觥。濯足思餘綠，洗心思雪清。篆溝合遠派，布竇垂高城。我願化飛雨，使君將勸耕。

輒姑題晉祠

范仲淹

山西通志 卷一百一十一
神哉叔虞廟地勝出嘉泉一源甚澄澈數步忽潺湲此意誰
可窮觀者增恭虔錦鱗無敢釣長生同水仙千家溉禾稻滿
目江鄉田我來動所思致主愧前賢大道果能行時雨宜不
愆皆如晉祠下生民無旱年

絳守居園池

絳臺使君府亭閣參園圃一泉西北來羣峰高下覩池魚或
躍金水簾常布雨怪栢鎖蛟龍醜石鬪羆虎羣花相倚笑垂
楊自由舞靜境合通仙清陰不知暑每與風月期可無詩酒
助登臨問民俗依舊陶唐古

登絳州富公嵩巫亭示同行者

歐陽修

羣峰擁軒檻竹樹陰漠漠公胡苦思山規構自心作惟予愛
山者初仕卽京洛嵩峰二十六終日對高閣陰晴無朝暮紫

氣常浮泊雄然九州中氣象壓寥廓亦嘗步其巔培塿視四
岳其後窺荆蠻始識峽山惡長江瀉天來巨石忽開拓始疑
茫昧初渾沌死鑄鑿神功夜催就萬仞成一削尤奇十二峰
隱見入冥邈人蹤斷攀緣異物宜所託顧瞻但徘徊想像逢
綽約嵩山近可愛泉石吾已諾終期友幽人白首老雲壑荆
巫惜遐荒詭怪香難貌至今清夜思魂夢輒飛愕偶來玩茲
亭塵眼刮昏膜况逢秋雨霽濃翠新染濯峰端上明月且可
留幽酌

送任處士歸太原

一虜動邊陲用兵三十萬天威豈不嚴賊首猶未獻自古王
者師有征而無戰勝敗繫人謀得失由廟算是以天子明咨
詢務周徧直欲採奇謀不爲人品限公車百千輩下不遺僕

賤况於儒學者延納宜無間如何任生來三月不得見方茲
急士時論策豈宜慢任生居太原白首勤著撰閉戶不求聞
忽來誰所薦人賢固當用舉繆不加譴賞罰兩無文是非奚
以辨遂令拂衣歸安使來者勸嗟吾筆與舌非職不敢諫

送李太傅知冀州

吾慕李漢超爲將勇無儔養士三千人人百貔貅關南三
十年天子不北憂吾愛李允則善規多計籌寇動靜寢食皎
如挂雙眸出入若變化談笑摧敵謀恩信浹南北聲名落燕
幽二公才各異戰守兩堪尤天下不用兵爾來三十秋今其
繼者誰守冀得李侯李侯年尚少文武學彬彬彪河朔一尺雪
北風煖貂裘上馬擎長弓白羽飛金鏃臨行問我言我慙本
儒鯁漢超雖已久故來尚歌謳允則事最近猶能想風流將

此聊爲贈勉哉行無留

司馬遷

王安石

孔鸞負文章不忍留枳棘嗟子刀鋸間悠然止而食成書與
後世憤俳聊自釋領略非一家高辭殆天得雖微樊父明不
失孟子直彼欺以自私豈啻相十百

王官谷司空侍郎故居

江休復

首陽采薇士商代緬以遐唐季有夫子遯世肥且嘉拔俗離
污險抗志凌青霞剝運扇頽風奸雄比回邪不然隨波流橫
噬猥猱牙吁哉土德衰睽垂鬼盈車英英夫子賢顯晦吾所
嗟想見棲隱情遺文搴菁華山藏白駒谷水遶騷人家躊躇
碧峰前寒日忽以斜

龍門

司馬光

山西通志 卷二百二十一
石樓臨晴空南眺出千里人憐山氣佳予歎禹功美想彼未
鑿時極目皆洪水誰知耕桑民幸免魴與鯉

和邵不疑校理蒲州十詩

飲亭

飛蓋名僚集臨流芳宴開縈紆漱文石次第傳清盃迴波亦
多意并泛落花來

涌泉石

蒼然片石寒百道飛泉吐高堂忽蕭颯坐失炎蒸苦蛟龍臥
欲飛仰嚙秋空雨

翠樓

條山翠氣橫隱嶙秋空窄危樓雨初度卷幌延佳色撲撲滿
前軒嵐光真可摘

碧樓

煙瓦疊琉璃危樓半空倚歌鐘奉高宴聲來碧雲裏日暮天
四垂黯淡如秋水

靜齋

逸二 句 聊窺碧甃缺寒草生歷歷時聞山鳥呼未得全幽寂

槐軒

逸二 字 軒已幽况復植宮槐簷外陰沉綠南山雨氣來逍遙不
知久驚此黃花開

涼

逸一字

逸二 句 清風滿四境豈獨華榭下不若楚臺人披襟獨蕭灑

芙蕖軒

荷花爛熳紅不見方塘水焦曉結飛閣苒苒清香裏露重忽

欵側翩然翠禽起

惜花亭

春意復蹉跎園林日愁寂枝邊緣陰重砌下紅英積茲亭花
最繁飄零尤可惜

竹軒

茂密正當軒欵垂欲侵案風枝忽交戛月影爭凌亂誠嘉君
子心匪直林亭玩

司馬君實獨樂園

蘇軾

青山在屋上流水在屋下中有五畝園花竹秀而野花香襲
杖屨竹色侵盞斝樽酒樂餘春碁局消長夏洛陽古多士風
俗猶爾雅先生臥不出冠蓋傾洛社雖云與衆樂中有獨樂
者才全德不形所貴知我寡先生獨何事四海望陶冶兒童
誦君實走卒知司馬持此欲安歸造物不我捨名聲逐吾輩
此病天所頽撫掌笑先生年來效喑啞

司馬遷

秦觀

子長少不羈發軔徧邱壑晚遭李陵禍憤悱思遠托高辭振
幽光直筆誅隱惡馳騁數千載貫穿百家作至今青簡上文
彩炳金縢高才忽小疵難用常情度譬彼海運鵬豈復顧繪
繳區區班叔皮未易議疎略

石勒城

孫渤

崑崙山峽間有地窄如掌雖得百二謀礪确非沃壤胡雛姿
相異圖慮似不廣如何蟻封微欲作南面享孤城出雲層遺
址尚千丈我來一把酒慷慨追昔在崛起亦奇才晉室方骯
髒敢與南陽公逐鹿中原上

蛇谷道中聞杜宇

張商英

高杉何亭亭北接奇嵐山如何蜀杜宇飛鳴來此間羽翼誤
爾身浩蕩迷鄉關日長岩谷迥口角流朱殷我亦有先廬三
峩出塵寰別來二十年仕宦髮欲班豈不懷西歸青葱映潺
湲有翼尚飄泊無翼何時還

王官谷十詠

并序

俞充

王官谷山水之勝甲於關右由司空表聖所嘗居名尤著
於天下好事者道出虞坂必枉轡以遊之灑滌塵慮想慕
清風隨其人所得皆有以為樂題名滿山巖屋壁獨詩篇
未甚聞於世豈騷雅之客多牽於車馬之勞不暇作耶抑
有之不能傳耶不然何遺之耶予為令於此三年暇日登
覽王官之景盡得之矣因成十詠自顧其詞之鄙俚不足
以暴人之視聽更冀當世之能詩者共賦之將以揚山川
之清輝發古人之潛德云

竹逕

入谷修竹密蒼翠連前山車馬迹不到鷄犬音亦閒蔽日清
影合迎風碎聲寒漸近居士廬溪水流潺潺

貽溪

表聖山居記云谷之名本以王官廢壘在其側
司空氏易之為珍貽溪溪舊不畜魚及表聖居
之石竇泉隙魚皆充物
見說魚篇今亦無魚

濯纓溪流上清心共澄澈人存魚自躍人亡魚亦竭此意雖
冥冥可與仁者說遺音竟誰繼十里閒風月

休休亭

本濯纓亭為陝軍所
焚復構之易名休休

洗耳謝市朝構亭得餘址三徑草長深一毫塵不起支肘看
青山引鶴聽流水獨有愛君心時時擬綸旨

表聖著擬
綸集兩編

山西通志 卷一百二十一
表聖影堂

事去惟山存遺祠臨水曲峻節凌雪霜英顏瑩冰玉至今崖
壁間尚耐塵埃辱清風滿林泉千載仰高躅

天柱峰

擎天有八柱是峰居其一根蟠地軸壯羣山俯為磧共工觸
不折萬古聳翠嶽幽人步絕頂引手攀星日

瑩心亭

野老傳此水源與洪河透潺潺浩難窮雨雹灑晴晝巖頭白
龍挂灘前寒玉漱不見瑩心人客衣冷如漚山居記曰瀑布之亭曰瑩心

雙人石

在天柱峰東

屹立高峰東峭直如昔賢夷齊恥周食巢由傲堯天不畏風
霜侵所依松栢堅五老靜相對森森莫知年

司空氏舊居

王官谷舊皆司空別業自表聖沒轉易不常

孤鶴去不還雲間犬空吠猶聞溪鳥衙尚有里人愛表聖多以金帛施於巖花無開落世事幾興廢我乘幽興來靜邀秋月對

石硯

表聖云西谷路有石如硯人謂之秦王硯

嘗讀表聖詩云是秦王成憫時著密史表聖所著密史深救時病對此潛
經營新雨淨如洗亂苔生復平應誤山中客浪近翰墨名

表聖機磴

誰鑿沌渾死智者爭出力悠悠蟻在磨雙輪轉何極機心運
機械隨流還不息莫笑抱甕翁終日亦飽食

貽溪懷古十篇

并序

唐衰全忠僭竊士之有忠義之心者皆深嫉之而能灑然
脫去不污其身得全其節者表聖一人而已予令於虞表

山西通志 卷二百二十一
聖之居適在境內造其祠拜其像想慕其平生爲之賦王
官谷十詠更邀世之能詩者和之以發揚其潛德奈何士
之知表聖者以休休莫莫而止耳予近得表聖一鳴全集
觀之至於一歌一詠一亭一榭意皆有謂非若世之隱者
自棄於山林之中無心於及物也信乎全出處之大節踵
夷齊之高風矣復成貽溪懷古十篇不揣俚鄙亦求和於
諸賢以表聖之德固不待夫歌咏而後見於世人之知與
不知豈足恤哉然予區區反覆之若是者蓋示其仰慕之
切也咏其名而揚其實庶幾有激於貪懦將歸寫於休休
亭以遺谷中之民使春秋社會樵童牧子相與歌於祠之
下以奉先生之祠雖愚夫愚婦皆知先生之德久而不忘
其祠焉

濯纓亭

皎皎居士纓豈有塵可濯愛茲滄浪清偶以斯名託轉谷羣
鷓歸衝岸游魚躍簷頭碧梧枝秋來垂影薄

覽照亭

山居記曰上方
之亭曰覽照

杖藜高山頭歷覽衆景會泰華屹若屏黃河瀉如帶幽懷逐
冥鴻萬事寄天籟不見玉京春荒煙起蕭艾

三詔堂

猛虎正橫行孤猿發長嘯名高世人間三枉鶴書詔借笏趨
朝參天意獨難料咫尺首陽山清光靜相照

瑩心亭

山居記曰懸瀑
之亭曰瑩心

妖氛滿世間瑩心茲得地瀑布巖前飛勢猛鷗鳥避洗滌無
纖塵澄虛全浩氣清風林表來千載有餘意

仙術秘丹經昔人藏九籥幽棲白雲根保此一爐藥吟殘深
雨來夢斷巖花落萬慮正坐忘未能看舞鶴

修史亭

表聖嘗著
擬綸密史

吁哉土德衰羣姦恣蝨賊欲加肅斧誅修史乃其職誰知深
山中法若春秋直俄驚濟陰變絕筆幽崑側

擬綸亭

大厦不可扶誥命已云絕老臣坐深林有淚化為血擬成絲
綸言救世心獨切溪流今尚清夜夜澄孤月

掛鶴臺

汙俗正朋亡歸來臥空谷養鶴不成雙相從守幽獨素羽信
非羣孤唳杳無續高臺委荒榛追想人如玉

一鳴牕

天寒松栢青廡閑騏驥老瀟灑竹牕前超然鳴以道惟有巖
上月時來伴幽討茲意不可忘還將拾殘藁

東渠亭

王官谷東西二渠水表聖定法
谷中人以時用之至今不廢

二渠日夜流利厚爭所起先生坐東亭立法書在紙老農到
今守後來誰敢毀斯人不可見空聽竹間水

金

玉華山中同裕之分韻送欽叔得歸字

雷淵

洗耳潁川水療飢西山薇山川得佳客草木生光輝末路風
教薄此道日已微相期千載事非君誰與歸

松嶺謁衛公祠

楊廷秀

澤居太行巔繞郭山如帶西南古松嶺傑出羣峰外巉巉聳

熊耳隱隱負鼇背小樓不垂簾倚欄日相對春風遇休沐俗
累謝機械寸心渴登臨老氣鼓衰憊陰崖冰磴滑凌澗鳥道
隘瘦藤盤絕頂清境豁眼界衛公廟貌存英氣凜如在法輪
靈迹古殿閣啓綵繪祖燈相繼續劫火不可壞盤亭接天壇
胸次何芥蒂蒼流會清泚緣絡分支派翠巒臥浮雲幽壑產
珍怪松風咽笙磬巖溜響環珮此來真勝游所適了無礙不
作白頭吟且償行脚債可喚千金兒漫寫垂堂戒

二樂游五渡谷

劉昂霄

南山如碧環缺處蒼崖開當年造物手辦此何神哉睥睨倚
天壁千古封莓苔源源萬斛泉飛出重山來白龍三百丈行
處鳴春雷巨石若棟宇磊砢相推排跳波與濺沫餘怒猶喧
豗我來值杪秋萬壑風聲哀黃花雜紅樹錦繡紛巖隈奇勝
夙所貪欲去仍裴徊題詩還自笑媿我非仙材

五拳秀峰

秦略

平滑石之俗其俗資磨礱磊醜石之秀其秀在醜中正如古
丈夫貌寢氣質雄又如聖人心孔竅虛明通大都一拳許含
蓄華與嵩大巧本若拙足見造化工好處元更多摹寫不易
工君其善調護抵擊防兒童

題南山友雲亭

王庭筠

朝游南山南暮游北山北所以兩山雲盡與師相識師自出
山去雲亦出山飛兩山眇何許矯首送雲歸雲歸人未歸小
亭無恙否向來有竒姿無庸變蒼狗雲兮淡而貞載與尋宿
盟論交須耐久持贈近無情清飄連亭側明月生空碧嘉時
爲招呼相與成三益

過興儒里二益

宋元吉

我初遊太學讀書思入官幸脫讀書苦迺知入官難去歲早
既甚今秋天早寒離離山上苗搖風青且乾居民愁凍饑於
我能自安繫馬就此憩慨然發長歎作詩見我意非欲他人
觀

三門津

王渥

層崖摩蒼穹四月號陰風大河三門險神禹萬世功他山亦
崔嵬砥柱獨尊雄雷霆日鬪擊悍暴愁天公劉侯智有餘始
令舟楫通仍餘石上穴飛棧曾連空遙瞻白玉枝挺植丹竈
中仙翁去不返此事真真濛夫人與鼓崖怪幻尤難窮獨喜
兵火餘歸然出新宮當時疏鑿意四海要會同誰知十載後
築壘防嘯克詩成一大笑浩浩洪波東

留月軒

元好問

丈室何所有琴一書數冊花竹結四鄰繁陰散芳澤閑門無
車馬明月卽佳客三人成邂逅又復得驩伯驩伯屬我歌蟾
兔爲動色商聲隱金石桂樹風索索乾坤月與我光滅卽生
魄元精貫當中寧有天壤隔卯君尚奚待言論累數百多談
令人厭坐睡驚墮憤一笑鷄未鳴虛牕自生白

讀書山重九詩

山腰抱佛刹十里望家園亦有野人居層崖映柴門昔我東
巖君曾此避塵喧林泉留杖屨歲月歸琴樽翁今爲飛仙過
眼幾寒暄蒼蒼池上柳青衫見諸孫疎燈照茅屋新月入頽
垣依依覽陳迹惻愴不能言

霜風一匣薄杳杳秋山空臨高望烟樹黃落雜青紅造物故

山西通志 卷三十一
豪縱窮秋變春容錦障三百里不盡臺山東燦燦黃金華羅
生蒿艾叢野人不知貴幽香散秋風秋物自橫陳顧揖苦不
供誰能搖醉筆吐句凌清雄

宇宙有此山閱世過鳥疾何人不此遊名姓寧復識茲辰世
所重前代多盛集柴桑有故事二謝留俊筆併數孟與桓此
外誰記憶人生百年內踏地皆陳迹獨惟我輩人興懷念今
昔山林與臯壤自古長太息

吾山一何高清涼屹相望龍頭出白堦佛屋壓青嶂雲光見
秋半旭日發豪相峩峩寶樓閣金界儼龍像鄉曲二十年香
火闕瞻向金花香綿芊夢想雲雨上福田行欲近重爲詩酒
障終當陟層巔放眼天宇曠

鴈門道中書所見

金城留浹旬兀兀醉歌舞出門覽民風慘慘愁肺腑去年夏
秋旱七月黍穉吐一夕營幕來天明但平土調度急星火通
負迫捶楚網羅方高懸樂國果何所食禾有百騰擇肉非一
虎呼天天不聞感諷復何補單衣者誰子販糴就南府傾身
營一飽豈樂遠服賈盤盤鴈門道雲澗深以阻半嶺逢驅車
人牛亦何苦

野史亭雨夜感

私錄關赴告求野或有取秋兔一寸毫盡力不易舉衰遲私
自惜憂畏當誰語展轉天未明幽窻響疎雨

林裡宿張靖田家

地屬壽陽

川涂盡坡陀嶺路入荒梗微茫望烟火向背得廬井殘民安
樸陋倦客喜幽屏兒童聞叩扉租吏有餘警兩崖紛叢薄砂

石立頑獷湍流落空嵌百折不容騁山深饒風露夜氣淒以
耿園花淡相望邊月空照影深居苦不早素髮忽垂領誰謂
林野人茲焉惜清景

虞鄉麻長官成趣園二首

鑿池水交流築屋山四繞衡門在人境三徑深以悄中庭八
九樹晨坐聽百鳥人生信多慮長寢容未了虛舟有天游我
定物自擾豈不與世竝自是萬物表達觀無不可言外當意
曉

蹉跎匡山游爛漫彭澤酒慨然千載上懷我平生友夫君負
奇節劒氣鬱星斗爲吏非所堪徑去如避走王官唐以還寂
寞蓋已久柴車君來隱清風動林藪至今溪上詩往往在人
口淵明不可作此士寧復有

寶巖紀行

陰崖轉清深秋老木堅瘦城居望已遠步覺脫氛垢寶巖夙
所愛丈室方再叩曛黑纔入門逕就石泉漱遙遙金門寺寶
焰出巖竇我豈無盡公昔見今乃又同來二三子寢飯故相
就況有杜紫微琴筑終雅奏矐矐土初日深樾炯穿漏逶迤
陟西巘萬景若迎候絕壁三面開仰看勞引脰兩山老突兀
屹立柱圓覆諸峰出頭角隨起隨偃仆不可無煙霞朝莫爲
先後橫亘連巨鼇飛墮集靈鷲九華與奇巧五老失渾厚想
當位置初遂欲雄宇宙太行有拱谷勝絕無出右大似塵外
人眉宇見高秀哀湍下絕壑電激龍怒鬪崩奔翻雪窖瑩滑
瀉瓊甃窮源得懸流偉觀駭初邁仙人寶樓閣白雨散檐溜
天孫拂機絲素錦絢清晝永懷登高賦意匠困馳驟窘於游

山西通志 卷一百一十一
暴秦百說不售林間太古石稍復坏飲舊已約銘窪尊細
鑿留篆籀茲山緣未了僧夏容宿留終當句餘年奇探盡雲
岫豈平良高委竟器不亦少竟請然因前於繪雲齊楚世
元付置四卷新狀中由人
李俊民
悠然林下客世事頗能料閒中意自適身外名何釣卜居山
之陽初爲識者笑勢將陵岱華氣欲吞嵩少方尋愿谷歸稍
近孫臺嘯微茫數煙岫巉絕對雲嶠爲我增雙明未必在遠
眺始雖如面友久得乃心照恐隨有力去或被移文誚已見
成膏肓百計莫可療一時煙霞語慎勿駭廊廟咄哉肖山堂
所以警不肖

遊碧落

并序

壬寅重午日陪郡侯段正卿暨王用亨劉漢臣濟之君祥
仲寬姚子昂張唐臣祿卿平陽趙君玉王潤之同行
浮雲翳炎景長夏愜幽事相陪林下友共造金碧地清流漱
寒玉老樹聳蒼翠何人開山祖妙處發天祕悠悠歲月深剝
落磨崖字遨頭興不淺有酒留客醉幽鳥背人飛不慣聞鼓
吹抵莫出山門溪風送歸騎

扁鵲墓

王磐

昔爲社長時方投未可錄一遇長桑君古今皆歎服天地爲
至仁既死不能復先生妙藥石起死效何速日月爲至明覆
盆不能燭先生具正眼豪釐窺肺腑誰知造物者禍福相倚
伏平生活人手反受庸醫辱千年廟前水猶學上池綠再拜
乞一杯洗我胷中俗

山西通志
卷一百一十一
楊 免

孫烈婦歌 婦姓吳小字二十平陸人適進士孫闕

楊 免

平陸有烈婦地望雄諸吳從居孩提間體貌迥爾殊舉家愛
惜心不啻千金珠眉拂夏繭蛾髻彈春林烏芙蓉美顏色冰
霜羞肌膚十二巧針指十四婉步趨姻親未省識閨門何曾
踰孫郎邑中秀少小依師儒雙親爲擇對買紅纏酒壺青鸞
得彩鳳誓結百年娛屈已接妯娒盡心奉舅姑孰謂連理枝
半壁先摧枯春風合歡牀分守夜雨孤西鄰久欽慕指王誠氏子
與六禮俱賄好靡不周下逮役使徒父兄去世亂倉卒誰攜
扶母嫂憐幼寡且微反哺雛號訴竟莫察僵仆氣不甦同穴
大義在初言寧忍辜日聞勢轉逼託媒致區區將汝已死婦
配我未葬夫朝決暮卽行參差當自屠王族忽承命垂首久
躊躕此事難爲諧此理古亦無女聞一撫掌天道卒敢誣腐

骨尚知愛而况生人軀素志從此伸里巷咸驚吁秋風萬馬
來所至皆邱墟粟堆坡頭路月黑忘崎嶇鄉兵共烏合焉能
保不虞俄頃鼓聲絕崩潰東北隅壯者被殺僂弱者遭縻驅
婦時飛懸崖翩若赴水鳧皎皎盈尺玉未甘蒼蠅汚鮮鮮全
匹錦豈容濁穢塗向是健男子足授丈二及航海鱸長鯨盪
荆縛於菟悲哉女子身裙裾鬱壯圖胡不具始末奏之達帝
都外則詔郡國內則正宮襦胡不構祠宇揭之當官衢近使
感義節遠使懲淫愚不然布臺閣直筆一再濡特書彤史上
永世瞻範模

與上人駐錫姑射山之麓他日邀余所居之靜樂齋勉
爲賦此

我愛與上人間處先著脚雖有買山錢難尋一邱壑向來棲

山西通志 卷一百二十一
息地龍象久寂寞重尋林下徑竹石若紛薄溪水恣交流巖
花自開落却掃丈室中一餅還一盃靜樂題其顏塵緣聊解
縛寥寥千載下此理誰發藥我今爲拈出未免一重錯有靜
必有垢無苦亦無樂混沌元不死七竅剛自鑿鄭重菴中人
萬法本無著獨有太古心油然而滿寥廓

潘叔 吾兄同仲堅采鷺鷥藤於午芹之東溪因詠詩見示前
代詩人未嘗聞賦此者此花長於田野籬落間人視
之與草芥無異是詩一出好事者將知所貴矣感歎
之餘敬次其韻有與我同志繼而述之不亦懿乎

段成已

微雨灑郊垆百卉欣並育幽花發溪側間錯金珠簇徐看是
鷺藤香味濃可掬忍饑出新句大笑負此腹遺落榛莽間采
擷誰見蓄情知無俗姿安能悅衆目先生日來往東溪路應
熟一經題品餘名字耀巖谷遇合良有時不才異山木

呂氏用靜齋

兩岬夾嵯峨一水中委蛇是間有高人靜與山林期結茅並
溪石故迹司空遺因山愛其山佳處應自知心閒境隨勝眼
靜山增奇寥寥丈室中日用夫何爲不書咄咄事高詠休休
詞無人書一編有興酒數卮便是一生了安問著與龜依依
中條雲夢想紫芝眉昨朝寄書至謂我來何時急營買山錢
已覺從君遲他年兩繩牀分忍西山饑

世主 蒲城董公余素不識其何如人也一日袖橫軸所謂龍
窩圖者同仲堅見過而以詩見謁余雅不能文詩尤
非所長者加之老病日久縱不避拙惡亦安能爲他

人椎肝腎邪渠請益堅余重違封意且念其勤姑因
所見以敘之云爾

封生攜客來謁我蓬蒿裏軒軒亢塵俗不知誰氏子所主我
既賢伊人亦云喜探懷出新圖一語煩舉似蹇余不能文三
請意未已溪山有素期入眼盡其美層雲蔽重淵萬木夾兩
涘飛流瀉絕壑千丈垂幅紙餘霏散如霧點滴亂紛委何物
竅其傍相傳龍所止廟貌寄空山何代爲經始年深祭血乾
亂久誰復祀威靈昔所聞對面隔千里誠通感必應雖遠猶
在邇巍巍窟宅尊安臥久不起何當洗甲兵倒挽幽溪水

陳子正容安堂

陳子少英邁逸氣不可挫典型肖乃翁出語輒驚座行止非
所能造物聽掀簸功名鷹在鞬歲月蟻旋磨區區一邑中十

載供史課結廬慕淵明志向有許大澹墨寫形似終日相對
坐一室足我容百念付慵惰青山隱檐楹流水出其左植花
數十叢種竹千百個事來若機張事去如甌墮浩然方寸間
不受一塵泥豈無二仲賢閒暇日相過有酒相獻酬有詩互
賡和溪山入笑談珠玉霏咳唾徜徉天地間一物莫非我醉
來語更真卿去我將臥主人正高枕山鳥莫啼破

題梁氏靜樂堂

攘攘區中人役心名與利於身竟何有乾沒不少置叔敬有
耳孫犖犖與時異一官不肯覓閒居養高志築室塵境中中
有塵外意方其厭囂湫歸來行少壑牀頭一卷書淨洗紛華
累苟能樂其樂寧復事吾事見客不吝情有酒卽成醉爲問
東華塵何如北窻睡清風吹我懷萬事覺無味誰知方寸間

山西通志

卷三十一

吳

自有清涼地

王恂

中條鬱蒼蒼首尾固雄大連山一臥虎矯首盡兩戒東南萬
峪門犖确入幽阨空青上絕壁截竅兩崖對南山開畫幘高
下蔚萬檜扶藜到山門黃衣六七輩寺殘薄水賞一水良可
愛尋源入雲蘿不惜阮屐敗掬飲清臆塵坐睨巨石怪山空
響佩環林迥騰怒獬行聽溪聲回周覽詢勝槩當年爽心亭
萬竹爭映帶碧鮮照清泚襟袂濯沆瀣人境兩渺茫佳句儘
誇邁開軒邀客飯放目欣一快盤餐固疎糲泉冽幾肉噉忽
焉林風振萬壑一氣噫前林疑虎嘯作勇助吾憊筆落還自
驚一掃衆峰鬣山僧喜醉顛海會得珠貝興來本無心遊藏
詫佛界夕陽送歸鞍依約虎谿外風煙作破墨塔廟失所在
鍾美厭摹寫闕伏化機藹盤空之硬語技癢若無賴馬首詩
遽成一笑豁吾隘

過鹿臺山

遠尋文石岡來歷南山纏鹿臺臺爲山幽徑蟠古篆後峪行
未盡前嶺已當面秋聲蕩林樾風露淒以泣陰壑氣蒼鬱疑
有虎豹變山田若無多溝崦耕已徧柴爨結半空羅絡碧巖
轉自憐終歲勤獸患防一旦我本山中人束帶對郵掾頓然
還舊觀瀟灑償夙願行經雙蟾嶺石怪驚變現闖首榭樹間
氣自太古練月中誰推墜囚鎖屬山縣乃知北平守認虎飲
羽箭物肖本偶然長歌下層巘

汾水道中

蒼巖互出縮峪勢曲走蛇回眺驚後擁迎看復橫遮雲林蕩

山西通志 卷一百二十一
高秋半嶺翻晴霞十里九度水清流帶寒沙山溪本幽寂激
之聲乃譁解鞍憇美蔭覺我心靜嘉風枝滿秋實野菊被水
涯幽馨散蘭馥紅鮮綴丹砂二物固瑣碎託興騷人誇我欣
記所見信筆書田家

去三汊見太行

郝經

二年大河間胸次洶餘浪身與天根浮泱漭隨下上靈槎杳
虛舟顛倒泥底樣恍疑渾沌初溟滓天水象揚鞭得西歸瞠
目爲一放舉首見太行逸翠蜚萬丈爽朗肝膽張豁達器宇
曠真宰聳奇骨頓覺天地壯茲山自佳色何乃自凋喪吾家
在椒嶢老霧橫莽蒼松楸日樵采山靈亦悽愴何時鶴髮翁
攜我蹭疊嶂雖無錦繡裏粗著文彩狀山河表裏全自古更
霸王於今何索然死石徒映向在人不在山先民語无妄行

行重行行落日兩相忘

平水神祠

曹之謙

城居厭囂湫林壑思自逸相將得佳友侵晨駕言出西瞻姑
射山馬首見齒峯行行至其麓一徑入蒙密靈宮闕清深流
水驚蕩潏涼飈自遠至回首炎歎失平生滄州興便擬此築
室翻然念男女會待婚嫁畢壺觴暢幽情笑語永今日題詩
記曾來夏六月初吉

題秋風亭故基

危亭冠雄雉飛構何崔嵬一夕墮劫火變化成煙灰頽基翳
蓬蒿壤道封苔莓蕭條古城上空有秋風來

德風亭

熊戴

天下多名山太行居第一澤潞伯仲間上黨天之脊屹立界

山西通志 卷三十一
中原形勢控南北千秋萬古松于焉杳無迹瞻彼德風亭巍
然峙孤立德猶天地風風猶君子德德風惟得人何草不狼
籍嗟彼德風亭在德不在飾冰湍味更甘雪乳泛玉液軒窗
瞰危臺垂雲紀奇石我來憇此亭登臨覽八極十年塵土襟
抖擻豁胸臆把此德與風無憂亦無戚矯首望太行太行山
自碧鳥詩招義陽義陽不可得日暮下亭來令人三歎息

題明月泉

節齋

古昔蒲子地今郡名隰川去城八里許美景分媿妍瑩此巖
上月照彼崖下泉波光始蕩漾曳影成嬋娟陰氣固相孚陽
應何昭然靜觀物有感方知理無偏心鏡生皎皎德化流涓
涓時備憲府列叅乘驄馬前適來暮春月勝賞中秋天作詩
記石壁恍若人間仙

次蛇谷道中聞杜宇

劉九源

黃杉接大萬元非岷峨山西州宗詩老行啞蛇谷間幽禽復
驚我峰巒夕照殷山水兩奇觀天地一大寰如何啼不已血
濺林木班懷哉感今昔世事川浚浚田園賦歸去謝爾東南
還昔人

過常山趙忠簡公墓

吳師道

客行常山道溪駛波沄沄源流睇崇岡問是丞相墳舍舟步
榛翳隧道不復分石碑已零落宰樹何披紛其傍曾元居混
迹隨耕耘亦有顯仕者遠去忘榆枌長吏類俗流但識期會
勤葺治禁樵採此事今無聞堂堂中興烈忠正而德文禍胎
偃月姦冤魄炎海氛淒涼櫓車還倉卒書疏焚誰知尉職卑
乃能杜使君蒼天佐賢俊微爾幾空羣興懷慨前事空山黯

愁雲咸陽骨安在唾罵奚足云騎箕儼天上千載彌清芬
 鄴民蒙溪山居 歲辰庚子書車數合卒書絕矣張映著 淵學
 我本山中人十年墮紅塵歸來媿青山青山解迎人十里如
 相望五里如相親乃知山德厚不以俗駕嗔藹藹桑麻原熙
 熙鷄犬鄰落落冠裳古悠悠言語真回思所遊地囂埃塞城
 闈終焉吾有約為報山之神 武報崇國 淵學 庚子

尊經堂詩

并序

柳爾貫

昔趙人安先生以布衣教授里中裒輯羣書大備經訓使
 鄉子若孫採擷芳華厭滿膏澤有餘則推之以及其鄉之人
 焉去今五十年尊其書猶尊先生即名其堂尊經堂曰此
 黃先生之志也太史屬蘇君伯修嘗受經於先生之孫最為
 得安氏之學者乃來請詩刻寘堂上噫書在安氏而其淑

百人之功獨安氏哉詩曰

聖人言純如載道行萬世貞明配日月廣大侔天地簡牘之
 所資包絡無巨細上而建皇極重覩人文麗下以開民彝性
 初均秉畀訓行宣光熙道否隔氛曠千人萬人心揭揭皆經
 誼此息則彼消剛柔乃殊位進乘休復機迪哲蹈仁智自絕
 其本根奈何取天劓燔滅滋秦穢網羅與漢利存亡書豈知
 論者常不置濟南耄言出孔壁發神祕百篇始昭垂五代著
 成父魯齊韓毛詩其傳迭興廢審音以知樂亦各徵四至樂
 崩名僅存緬想歌鍾肆禮失野可求誰明射鄉義制氏記鏗
 鏘后蒼詳數制區區象聲容詎得作者意賴夫春秋家尚識
 王道貴載事或稱誣推凡疑翼偽田何受孔易其全緣卜筮
 楊施孟梁徒別出踵焦費挾書律始除六籍豈俱逝傷哉居

下流衆惡所萃駕言拾灰殘我道猶未墜乘之以顓門中
復糜讖緯黨同護朽竹攻弱擊枯趾文字日荻滋編策亦鱗
比孟荀與楊韓先後參與衛擇精語益詳炳炳詔來喬一籥
節衆音八風無濫吹方張乃遂翕已矣更五季大明升殿郊
熒奎屬炎彗春陵南標正陝洛黃離繼經世偶潛虛象圖合
而異舉隅豈無反僅若小星嗜肫肫紫陽翁敷賁了羣跡在
時張呂間建學特超詣一鼓行無旁八區同教肄矧茲龍德
中美化純漸被家書動盈屋人事各康濟恭惟罔極恩聖哲
布嘉惠經尊道則尊有合嚴度寘覆之以堂庭牖戶亦崇邃
古史洎今詮珠駢而玉綴高名以經揭酌原知水味譬如登
喬嶽岡阜左右睇草木流華滋煙雲撤織翳觀生老其間面
背俱益晬豈惟一身謀直作數世計是家離石宗遭亂藁城
寄劬書自玉峰菑播實深概子孫刈其熟穰穰收秉穗後來
及門士妙合若龜契尊聞行所知况復躬自致過逢託師資
忍負築場志我願安氏堂廣作天下治矜式表國都弦歌行
黨術蓄誠以端蒙達生以知類惇典敘彝倫三郊而五禘與
世開隆平吾經固無累自微可之顯道豈不在器世間有形
物展轉資弊弊游談亦何根閣束祗自棄是將比鎮寶前人
所數遺手澤尙鮮新一展一流涕晝誦夕思之上帝儼臨泣
作詩諗蘇子孫曾戒無替

平沙北流水青山在其上李陵思鄉臺駐馬寺西向草根舍
餘淒峰尖入寒望俚言雖莫稽陳迹尙可訪想其深入初步
卒亦材壯手張天子威氣奪名王帳覆車陷邊塵此志迺大

聖悲望李陵臺

匪願為君其歸土思豈消無風雲塞亭前干

山西通志 卷之二十一 藝文
妄一爲情愛牽皇恤身名喪縷縷中郎書挽使同跌踴安知
臣節恭之死不易諒河梁執別處出語謾惆悵家聲故燁赫
三世漢飛將兵法有死生人運迭休旺忠回在信史豈沒功
罪狀馬遷當腐刑強欲雪其謗士思豈能無層雲塞亭障千
年麒麟圖吾將執元覽替

河漢鼓堆山古意薄一異一流制畫而文思之靳帝柱調節
登彼覆釜堆遠眺覺清適西山石腋開遙遙倚天碧黃流俯
東來渺焉如一粒乾坤古今間不知幾陳迹神堯昔封疆士
薦舊城邑民俗儉且勤食力無寧日兩泉溉萬田寸土十金
質祠神雨亦靈鷄卜時告吉絳郊不壘年芳草翠如織我勞
思古人叔回亦及識悠哉天外吟何得復何失

居園池

并序

游園池

游園池

游園池

游園池

游園池

游園池

游園池

乙酉之秋七月既望余自河中讞獄還司過絳登守居園
池昔日亭墅悉已湮沒獨洞漣亭花萼堂復構以還舊觀
流泉蓮沼猶仍故焉堤柳陰翳逕花鮮妍庭竹數竿清風
冷然有塵外之思卽是賦詩曰

絳邑舊名藩牧守優鴻儒逶迤山中水曠達園池居雄并歷
晉魏揖讓隆唐虞世遠民俗漓訟劇古道疎環列多館墅莽
蒼變邱墟慘惻歲年深寥落兵燼餘迴漣復亭構花萼懸堂
虛被襖引流觴賓筵聞鼓竽錦香綴逕蹊琅玕繞庭除公暇
寡接交游觀足清娛緬懷前哲人冠蓋秉鈞樞遺愛勒琬琰
清風生坐隅卉木均雨露藪深樂禽魚端來濯塵纓詠歌登
舞雩夕陽明翠巘秋色淡紅蕖鄉關動離思雲烟隔荒蕪綉
斧倦行羈霜日烈修途故園有松菊盍用還菑畬

明

姑射山

張昌

哦然姑射山中有玉洞仙脂膚若冰雪被服行蹠躡朝食石
上芝夕飲澗中泉有時駕飛鸞飄然凌紫烟

旌忠廟弔後唐裴約

王堅

嬴秦破洪荒末運開五季乾綱倒狂瀾龍虎恣吞噬毒流滄
溟深虐燄乾坤熾誰爲柱石臣力挽回天勢桓桓裴將軍名
節期砥礪伏事李嗣昭騫騰賈英氣夾寨守踰年忠誠舊昭
義嗣昭領元戎甘苦同軍吏一朝解重圍汴水驚鼎沸周旋
二紀餘相親若肝肺南轅守澤城鎮靜得專制髻鬣巷有歌
夜月厯不吠翠華重親征賜姓神堯裔誓將雪昭陵問罪興
漢幟大勲以垂成元戎忽先逝繼韜固佳兒胡爲反徼利柩

中肉未寒略不君親視巍巍基霸功上黨固屏蔽一朝與仇
讐割斷河東臂銜枚汴軍來此邦可無備酬恩寧死忠臨危
敢攜二裹瘡夜巡陴顧與城俱斃期將先軫元碎作睢陽厲
情鍾唐帝懷死獲將軍志當時一武臣英烈乃如是嗟嗟馮
大師曾不知垂涕朝爲仇敵人暮作君臣契累朝位三公亘
古羞犬彘請觀公之爲九萬見飛鸞堂堂歐陽公直筆著清
議官崇刺史封廟錫旌忠諡芳名重山邱富貴誠夢寐我來
守此邦雨暘賴神惠朝廷饑犧牲春秋謹時祭衣冠儼容儀
黍稷加精糝廣庭聞苾芬旋飈肅鳴騎觚觥暈朱薨豐碑勒
雄記始知先聖王垂教重名器向如始皇君今日皆魑魅再
拜瞻廟容斯文亘天地

土谷十八盤

徐賁

山西通志 卷三十一 藝文 五
土谷既深入高山復嶮岼微逕纔百尺下轉十八盤俯臨澗
壑險勢陡不可看亂石鬪磊砢置足恐不安長鑱那可托藤
蔓無由攀寸步每千慮舉動如蹒跚心膽掉欲碎毛髮亦爲
寒戰兢尙未足何暇發慨歎平生行路心此日方知難

沁水縣

一水隨山根宛轉流出迴灘聲繞縣門孤城數家靜風土殊
可怪十人五生瘿土屋響牛鐸壁滿殘日影行遲欲問宿連
戶皆莫甯亭長獨見留半榻亦多幸呼童此晚炊糲飯穀帶
穎野藪不可得敢望肉與餅途行乃至此儉素當自省

渡沁

陸行渴懷抱今渡沁河水奔騰走百灘聲遠聞數里我來坐
其涯肩擔欣蹙弛不意山塢間偶得見清泚連朝塵沙目豁

爾淨如洗雖云倦行力對此何足喜南風吹青蒲白鷗忽飛
起

天井關

峰迴抱深壑下視天鑿井昔人建重關扼險備邊警鍵鑰久
已絕垣石尙森整峨峨尼父祠門掩衆山靜曾聞此回轍無
復過斯境詢知鄉老言此事古未省餘氓數家在破屋暮煙
冷我行力稍疲景物不暇領且爲投宿來驚風夜愁永

羊腸坂

盤盤羊腸坂路如羊腸曲盤曲不足論峻陡苦躑躅上無樹
可援下有石亂蹙一步一嗟吁何以措手足途人互相顧屢
見車折軸少時徒耳聞今日親在目不經太行險那識安居

福

山西通志 卷一百二十一
三
女媧墓

空山兩高塚媧皇此中葬焦土積層巘勢助殿閣壯大哉補
天手功出千古上至今煉餘石火氣夜猶放轟雷常被護烈
風日掀蕩陰林慘可畏怪木高數丈百鳥飛繞枝欲止不敢
向地靈氣所鍾祭禱土人仰經過謁祠下幸獲拜神像

霍山

霍山古北鎮勢尊出羣麓山深異風景春盡樹未綠居人苦
多寒鑿土爲住屋屋頂土元厚亦種麻與菽乃知此方民猶
有上古俗我欲拜其廟日斜去程促窰烟歛暝色牛羊半歸
牧征塗多嶮巖村館早尋宿

太陰山

巍巍太陰山厓壁拔嶄峭積水嵌層壚凜若太古造凍深草
木堅僵立勢難撓高寒橫障空陽景未嘗到隣有羲和墓欲
問莫可吊如何於此地獨不被臨照至今山中烏無性識晴
昊聊爲志其事因之發長嘯

詠聖佛崖

于謙

鑿石成佛巧石內無佛僊佛是幻象石石是佛渾堅如佛能
有靈石靈在佛先佛原不在石靈在人心邊石旣能成佛人
何棄聖焉性中原有聖性上聖無偏天命與人性何嘗私聖
賢忍將無價珠墮落泥沙淵一害於詞章再鑿於簡篇體認
敬義字爲聖賢學全

其巖度桑乾

祝衣顯

金龍池畔水演作桑乾河東馳入滄海浩蕩成洪波誰知稽
天流發源始盈科覽物感人事防微當若河

山西通志

喬宇

南來太行支壁立勢凌駕巉巉巨巖旁若爾開一罅崇柯冠
其巔奔浪遶其下遙觀若無有尋丈不相假我遊亦屢經將
覽輒弗暇今晨值晴景健興莫可罷徑仄翳蒙茸殘雪積未
化折荆旋掃除遇險或平跨上塑宣聖容虛敞構精舍石刻
紀至元讀之頗自訝云聖西遊時過此留夙夜因呼村翁語
相傳匪誣詐北有孔子里郊墟接桑柘巖以夫子名斯事無
異差樂平古晉疆上黨周流亞澗道多佶曲難若登泰華孔
轍想未經勝蹟安敢詫不然載籍中遺漏恥游夏千年事渺
茫欲辨鮮憑藉誰當破羣疑永定茲山價

白巖山

兩儀判清濁山水相峙流上黨雄北境太行界中州茲巖名

以白崛起良有由根盤連坤軸千里互周袤三峰迥羅列勢
與恒霍侔立表不能算丈尺焉可求其下俯臯落其廣瞰仇
猶雲雨澤萬物四時無愆尤我本晉冀產氣格山相投平生
所仰止取號以自修冉冉壯及老閒心始獲酬勝日扶杖屨
邱壑咨遨遊拾級緣澗磴蹇衣涉溪流河山一統盛極攬兼
窮搜因思纂國志何以不見收遺大撫瑣小世事多謬悠與
客成一笑呼觴進餽羞燕齊接近壤秦蜀亘遐陬吐吞風雲
壯指點林壑幽浩歌坐絕頂天地同浮漚

樂平橫山

樂平古封邑水谷分一都橫山顧其北風氣相環紆始祖旣
占籍族大成村居東峰紛擁列纍纍如貫珠平行卜兆域附
墓昭穆居上刻左丞文次列譜系圖松枝交屈鐵蟠龍形不

殊相傳數百載子孫咸怡愉或奮力耒耜或究心詩書地靈
毓人傑此理固非誣祖考繼科甲金紫耀仕途至予兄弟輩
亦復業文儒仰荷國恩厚勉承家慶餘所幸孱劣質耆年遂
懸車時節會宗族燕飲合親疎黍稻陳酒饌羔豚具庖廚欣
遇太平世永無兵革虞相勗敦善行薄惡相芟除庶可保門
祚足稱君子閭作詩告親黨勿謂予言迂

宿虎谷

王雲鳳

我本山林性誤遊入塵埃弱冠辭里閭十年始一來家人聞
我至促釀牀頭醅父老見我喜相顧忽以哀自言老未死死
者安在哉籬間過炙雞山色映尊罍隣翁曳杖至傾倒盡餘
杯但知醉爲慰叫叱不相猜飲罷出柴門遊戲步崔嵬岡巒
盛松栢瞻眺久徘徊何時不復去浩歌心肝摧

虎谷

深山草木稠結廬向虛敞盡日無人至禽鳥互來往讀書心
力倦手曳青藤杖出門何所之獨坐盤石上山頭白雲生我
心自蕭爽田父驅犢來喜道桑麻長

鐵牛

邵寶

河北偃牛尾河南峙牛頭牛身亘河內萬古鎮陝鄂作者云
自禹精深協神謀母金厭子水以類坤爲牛默奪造化用一
沈永不浮摩娑太古色至今幾千秋公行視其脊欲鞭且還
休奇非銅槃比質有石鼓侔願言頌公德屹然坐中州中州
不足撫四海亦橫流

遊晉祠觀難老泉

王鴻儒

一泓俯幽深疑有蛟龍臥却立不敢窺况敢輕一唾瀉竇玉

珂清入村羅帶澆涯空或通海流駛可旋磨下漑稻千頃旁
闕竹萬箇行旅藉飲濯居人免寒餓崖刻半剝落石路時坎
坳林靄滯行程山風牽臥課俯觀魚鱉遊仰乏燕雀賀豈伊
道士貧母乃令長過右顧十畝塘西有百重邏恨無擇勝亭
與客同唱和何當行役休遂此股肱情得與二三子終日臨
池坐

太行歌

祝允明

上客坐高堂聽僕歌太行六歲從先公騎馬出晉陽遙循厚
土足忽上天中央但聞風雷聲不見日月光狐兔繞馬蹄虎
豹嗥樹旁衡跨數十州四面殊封疆童心多驚慄壯氣已飛
揚自來江南郡佳麗稱吾鄉邈哉雄豪觀寤寐不可忘人生
非太行耳目空茫茫

媧皇墓詩送喬太常

正德元年丙寅武宗
卽位遣官禮百神

李夢陽

伊聞女希氏奮迹鴻荒日神功義農並吹簧豁陰鬱熬極本
寓言蛇身竟恍惚遺墓趙城側古廟松杉密霍嶺峙巘岈汾
川眇蕩潏穆穆秉德臣肅肅奉瞻謁祈靈泝遐躅明禋備精
物天雖積清氣運久恐漏闕徒煉五色石寥廓詎能越送子
顧周道俾我心於邑

豫生

士有氣相感殺身酬所知伯氏旣謝世族姓無子遺噬炭甘
若飴漆身亮何爲生旣荷君遇沒敢求君知仇聞再三歎攬
淚惠新衣玉劍四五動左右神爲摧愴哉彼流水迄今爲鳴
悲行路佇歎息芝蘭繞墳基人生固有畢節義誠難虧

北極靈跡

劉麟

翩翩玉堂子迢迢湖水濱
睠彼取笏者結屋乃比隣
大君昔造命况復聖且神
郭公會其逢易置如轉輪
於何幽冥中默定良以勤
永懷世上事夢卜真何人

寄題白石樓

康海

我聞白石樓乃在大行下
丹機凌紫霄朱薨接巖罅
盤鬱橫汾曲崔嵬紫金屨
夕烟蕩洞瀾朝暉輝簷庑
兩溪互縈帶千峰隨晦冥
屏障萬翠列花柳四時明
平生喜遊眺詎可如孫登
春中過函谷遂有渤澥行
徒懷南莊老安能愜初盟
人事苦迫促三日滯虞鄉
雖有泛舟趣却無曾點狂
回想王官谷新詩滿素墻
不識蕩溪姓徒羨詩思長
何當與握手於時共徜徉
同遊誦其名知是南莊子
故家有若人私為南莊喜
遨

遊翰墨場倏而踰四紀不謂英妙姿尚在秦晉里
便擬此登樓醉汝賢喬梓三嘆發朝邑彌月興猶起
感君寄書至展轉愛君才欲見不可得空望白雲隈
吾有雙黃鵠飛飛自天來因逢王子晉借之遊蓬萊
一去竟千載寥寥不可回回時坐鶴背孳子臨高臺
先過崑崙頂後瞰弱水湄徐訪紫華君持其雙玉芝
吾意竟不歇君心尙弗改寄君白石吟殷勤為子待

春日同王子游王官谷

限春寒花遲四韻

呂柟

懷思溢十載晤語及初春
牛馬風滋背火水時亦因
大婦織麻臬小婦刺錦茵
箴梭各有托諒者皆在勤
蕭蕭出門戶望望追侶人
携手同征邁遠上條山岑
飄飄飛雲表初日親可賓

織席備寢臥織布祛時寒一身不自用抱之市闐闐百川皆
東逝弱水獨西還趨海苟無二奚懼筋力單女媧尺寸手五
石如彈丸天大渺無極煉之可補完哲人慎微細矜莊有異
端

種樹思摘果不徒見開花花開十日殞果摘還生芽昔有青
門子年年止種瓜瓜蔓大如柱瓜實大如車白日生東海西
極有落霞光輝苟無損且猶天中過雖有魯陽手焉能常揮
戈不見東隣女夜半猶績麻

章亥足非速齊魯去豈遲五石瓠亦小鷦鷯剩一枝玉石與
骨角義存綠竹淇乘馬馳遠路乾餽還自隨力匱踰絕險頓
可使勿饑不見松栢樹歲晏猶若斯鯤魚與鵬鳥畜之在天
池

宿太行寄憶馬仲房

常倫

盤紆太行道行行衝北風伏馬疲日暮息徒莽蒼中之子倏
異域晤言疇與同展側不能寐撫劒臨前楹明月望霄漢四
衝羅列星咄彼參與商使我心中冲

王公石

王濬

驅車出楊村遙指黑山陌菴菴村中柳青青山上栢險阻開
蒼莽忽見一片石岐路紀浮山云是王公跡隱隱石上文摩
挲識其畫不見峴山碑歲時忽復易苔蘚蝕龜趺風雨剝螭
額望之淚猶墮忽忽流餘澤伊昔升公堂言容儼朝夕對此
墊踟躕凄然秋草碧

春日同呂子游王官谷

限春寒花
遲四韻

中條何逶迤天柱鬱嶙峋西指重華都世遠見隱淪矯矯司

山西通志 卷二十一
空子誰能識其真高踪耿不滅竝游屬早春北山有松栢南山有荆榛所托元不偶孤嘯傷心神

了了一高士移家入王官流風日已遠邈焉不可干清清濯纓水鬱鬱採薇山人各有適所慮非飢寒賤者豈皆素貴者豈皆完哲人敦素履被褐詠考槃翛翛雙白鶴凌風起高翰

仙洞留巖阿望之阻且賒嘉樹來孤鶴幽草抽繁芽羣仙不可招中懷寄瑤華歲月銷容顏譬彼三春花人生不努力衰落同咨嗟呂子玉堂仙昔游懷已嘉携我再游行白日千峰斜大道以爲期吾將臥煙霞

嘉賞故無倦春日不冝遲脩來下丹梯散步臨前墀仰視雲漢光星斗何參差俯視瀑布流雙橋迴漣漪促膝吐衷曲人事乖所期抗手過橋門飛轡東南馳路遠石不平中宵繫吾思

鹽池

蘇祐

龜疇演潤下龍文陳實中煮海聞吳疆鑿井稱蜀雄睠茲條山側泓水何冲融築場豈仲父疏渠殊白公南風洞宣朗葳蕤秀瑤瓊結斗麗方池形虎薦清宮權利通四國坤靈昭元功直廬附周圍嚴扃啓中通報貺崇神棲千載誰能窮

秋日始遊書院

余光

驅車出西門原野秋色暮迢迢望孤山陟向暹渠渡白楊嘶寒風夾此宮牆路遊子懷慕久披拂以亟赴入門瞻聖像慰我中心素躊躇俯荒池傍徨倚紅樹解衣攀薜蘿獨向雲顛駐幽巖生紫霞怪石走虬驚巍巍今日山母乃平地布輓轡

山西通志 卷二百二十一
汲井泉曲引山根注涓涓昔成流源委時可泝汲引功弗停
鑑沼復澗澍忽然見弋魚恍與西渠遇奇哉西渠子勵志搜
遠趣觀此山與泉真學基已固緬我涇野師繼此鳴韶濩青
衿萃講堂春風滿元圃樸械化已長顛藥生時雨鳳凰一高
翔百鳥咸振羽云胡余子來孤翼何所附空堂成寂寥傍舍
亦歌聖伊威穿敗垣蟋蟀泣野露誰能效綢繆補葺一如故
撫景懷伊人長嘆不能賦

自平陽趨蒙城

張佳印

首冬邁川塗跋茲平水路霍雲遞迴盤汾流莽奔注濛汜沉
曦陽僕夫阻昏暮駛轍遵蒙城攬衣侵霜露礎杵環郵軒解
裘貫村醕四壁依蘭缸孤唵托情悽嗷嗷西求音無乃冥鴻
度歷亂江上懷北風吹庭樹

石樓待月

郭紘

須臾我待月月來亦須臾月照此今古圓缺何不渝中有蝦
蟄精吐氣成寶珠我欲往殺之飽食觀靈樞歸來一長嘯清
光遍九區

題冰雪堂

王道行

卓彼劉節女良人未娶亡孀居五十載足不履門牆心志堅
金石冰雪揭華堂賢名書太史奕世垂休光清冰和白雪可
擬劉氏操雪消冰亦解女志獨堅牢泣血踰三年時日良悲
號克養公姑孝塚邱躬自抱令名耿不寐猶憶儀兩髦以之
喻冰雪榮之華袞褒婺山同屹屹婺水同滔滔陳詩附史編
千載咏清高澄澄玉壺水皎皎瑤天雪不濁任爾撓不淄任
爾涅雪白母之心冰清母之節一天從匪他萬矢何絕決冰

山西通志 卷二十一
玉自輝映閨門自英烈嗟彼怕寒者誰能望高潔嚴冬寒冱
時衆芳盡凋歇不有堅貞操誰與傲冰雪春風冰易解朝陽
雪還竭嗟嗟烈女心始終同一節久持冰雪操人視竟難堪
潔白渾如一巖凝已並三孤寒咸莫受苦節獨能甘列傳稱
賢母千載播斗南

鴛漿泉詩

張四維

中經富名山蜿蜒帶河滋造化剖幽藏邱索標靈致特峰竦
湖陰高指觜觶次南望揖嶽蓮連岑近相避絕頂有神泉決
漭含元氣澄泓滿不溢熨潦邈不異雲漢凝清暉灑露奪甘
味厥惟帝臺珍鴛漿自昔誌頃余釋塵鞅鄉山恣容裔尋此
奇勝蹤疑爲鬼神秘秋波浸空碧曉月弄山翠躋攀日無休
吟賞夜不寐拄杖龍所化恰與仙源值膏濡草木蕃氣蒸川

原媚恍覩九仙境快我千古意振衣天宇濶鳴絃水脉沸迴
眺飛仙洞巖壑下無地信宿澹忘歸蒼茫結幽契王池授丹
訣湖音聞未試靈液欣可托永言滌心累

登清涼石

邢雲路

四圍山面面九步石方方石方方何清涼廣容千萬衆傳者
疑荒唐觸蠻蝸國戰大地黍珠藏睠此九步石行者宜徜徉
茲石能令來者行茲石能令行者悅茲石自清涼人心自炎
熱

謁師大夫子野祠

邢大道

汎汎澗水流行行河之滸莽莽眺村原離離秀禾黍蕭蕭二
畝宮村東三里許野狐走低垣山鬼嘯深樹先民邈何扳寂
寞此邱土遺像儼中堂白雲繞庭廡松風絃響悲哀鶴鳴且

山西通志 卷二百二十一
舞嗟嗟晉大夫賢非樂師伍智鑑炳蒼龜讜言凜斤斧識者
謂之聰昧者謂之瞽傷哉不逢時悼乎非其主村翁一瓣香
卮酒神不吐邦典肅牲牢官僚承簋簠配饗虞士師高名俱
萬古

師南里周眺村原讀聰聖志贈耀昆

地靈人迺豪人豪地爲美太師產茲土師以名其里冷冷舌
泉清鬱鬱箕山紫田廬六百家林林聚生齒農者業不貧賈
者名亦起脫跡農賈間英英范氏子儒賈賦賣金書田筆爲
耒冥心探往蹟努力追前軌逝矣聰聖公千秋有信史

葦棚詩 并序

曹于汴

癸卯得告還里賃住室淺苦暑乃買葦箔數卷縛棚以廣
屋簷甫及半已覺灑然旣成則密不蔽風疎不漏日鬱同

邃厦燦若花陰度夏無慮卽使歲一新之不過歲用百餘
錢終吾之世費不數千徼祿足辦無難也不亦快乎
結葦爲高棚清幽障暑酷袒背臥藜牀稚子供脫粟有時藝
檀蘭古編可朗讀托身六合中風光到處足還期招所知茲
樂誰能獨

遊景明園覽巖壑竟日

李永培

里巷紛多擾村落忘折節灑氣散青烟飛流噴白雪濯纓俯
前溪捫蘿躋石室樓閣起參差樹木雜森掇水潺人語隱巖
峭鳥飛絕竟日臨不倦適與心神悅更上最高頂城市如邱
垤

景明詩

張銓

山骨紫金稜泉聲白玉澗峭拔隘中條孤幽秘九畹春事尙

山西通志 卷一百二十一
刁搔捉臂何繾綣塵骨歷嘉辰登臨愜夙願翳然林木間桃花未許褪振衣凌虛崖佛光若不遠徙倚出高松羣峰自來獻薄霧蕩風弦灑落寒蛟噴蒼冷滴衣裾萬籟歸方寸臥石倒烏冠興劇不爲勸仰視叫青昊魚鳥窺之遯黃埃十日心聊此蘇委頓疑向武陵來曾進漁人飯

試府學寧鄉兩學諸生明倫堂

文翔鳳

巴蜀規王者西河疑聖人荊州旣持論終亦謬稱臣從來多自大不免笑洪鈞龜茲應非馬匍匐壽陵塵夜郎休擬漢禹圖曠無垠六經續王氏雅志抗千春廡門談禮樂雍雍在河汾仇董將無褊顏冉未堪倫姚薛成中說輒以當泗濱遂被吳楚誚莊夫挂志曠吾道歸位聖如奉斗樞尊羽儀方端木九流笞濫淫忝應教化主廣大括一元堂端危獬豸代野括

麒麟誓以天人力破茲歷劫昏長庚舉右幟大丙推輕輪一戰清江湖再戰踰崑崙奇書收羣玉明珠采大秦希聖稱良宰絕筆贊獲麟文學匪具眼言語聊激脣卜山一坏土甘爲魏侯藩願曳垂雲罕八紘掩俊民彌天兼四海釋習眇羊羶

題林宗

蘇舜澤

高張琴絕絃暗投珠委路嗟哉東都士禍樞踵危步穆穆郭林宗深心托幽素含章貞自抱誠微幾早悟仙舟聊可竝墮甌豈堪顧懿彼烝民章明哲伊誰賦

佛耳摩雲

朱雲鳳

佛耳高插天掩冉雲滿谷吉人玩奇變昕夕看不足迎風翠蓋翻映日錦屏轟曉摩霞影紅晚盪黛光綠卷舒總無心悠然潤林麓蒼生渴霖雨遲爾生百穀

奇石

倪光薦

五載牧魏城未登大峰麓馬走每自嘲官乃因人俗偶經百
廿盤陟岡須我僕瞥見石與松駭然驚心目石以松爲筋松
以石爲肉石抱松如裹松穿石以束纏結具一體誰復分各
族拱把歷風霜一卷共蒼綠信有化松石亦有生香玉乾坤
恣靈幻何必生人獨倘有道州筆石魚增華縟若逢無爲顛
袍笏幾拜伏可惜絕世珍寂寞置空谷只今徘徊情廿年如
日矚再遊當無期拈管紀片牘行將寄芮人邑乘添奇錄

題龍門山寺

孫激

澗水激潺溪危峰百丈峭山僧道心真締構甚殊妙殿閣開
崢嶸丹碧互相照我來雖抱檄乃得塵外笑秋聲起巖壑宛
若蘇門嘯下步窮水源高攝白雲嶠豈期俗士駕放目一覽

眺微官安足榮歸歟從荷蓀

北極靈跡二首

陳寔

峰迴松風長危蹬出蘿蔦上有紫皇殿碧瓦耀青昊帝尊儼
廟坐祝史嚴汜掃風雲擁輿衛日月照龍藻達人慕真境遺
世歎不早何當置短鋪住此種瑤草

三晉古雄國歷世多異人偉茲壺山賢開國推文臣微時撥
神笏塑偶起欠伸登龍首臚唱氣壓三千羣誰云貌不揚便
腹皆經綸何時拜遺像千載瞻風塵

雲左立帝祠有鼎焉榆生其顛不知根之所託也質齋

兄奇而賦之余亦擬古以暢其意乃咏五言十六韻

吳亮

歷歷元宮榆託根在鼎族五行本相克而金乃生木猗秉鐵

山西通志 卷二百二十一
石腸爰奮雲霄躅况鍾星斗精豈憾風雷剝修條森扶疎秀
穎勇鬱郁華林多凡種厥土鮮五沃蕪蕘紛出地莖樞曖彌
谷貞性迥不移赤心善稱獨烈火葉弗摧隆霜幹逾蠹何殊
栢與松凌寒挺孤麓丈夫貴樹立寧忍隨流俗晚收嗟已莫
東隅毋失足甘與草同腐倥傯自迫速永言隰榆篇悠然發
深觸盟心恍如在涼颺來謾謾神靈長訶護竝受王明福

韓雨公圖書府

陸啓宏

三晉有奇士載書過墨子出旣富擔橐歸乃付藏史腹笥本
便便石倉信亦美古味酣蠹魚豈獨三吞止緬仰郭林宗五
千實累累

題杜四輔

劉欽順

前山傷稿木昭代聞人出一戰勝河東獨步廣寒宮飛龍瞻

淮甸夜夜夢豹變山樊入天使大人時利見黃幄則爲臣青
宮則爲友魚水歡莫旣素絲梳滿手

龍門篇

焦源溥

懸河青霄下湧騰萬里迴奔濤誰能障巉峭斧鑿開圻巖墨
於鍊瘦蛟僂怒顛蜿蜒東如帶石空出長虺虎牙交象耳咫
尺秦晉隈飛魚乘勢上努力風與雷從斯多放肆浩渺欲九
垓漠漠陰霧合拍浪捲沙埃昔我亦陟此携朋良悠哉慷慨
十五載往事總成灰今提河東士越棧躍龍媒登降乞禹靈
四睇聊徘徊偉矣縣大夫懸知禦敵才藥師王弟子雅隨擒
虎來豪氣凌風舉壯歌酒一杯欲窮渺無際忘倦更登臺貌
貅奮髯立影晃錦鱗皚大纛懸朱雀閃閃動崔嵬磨刀濁水
赤飲馬長浪堆誓將洗惡波華甸澄鯉塵

山西通志 卷一百二十一
砥柱篇

洪河龍門來奔崩華山趾誰能繫飛流疾如弦激矢下流日以深滔滔想莫已有石一拳多亭亭水中峙憑來欲東歸觸之還復止老蛟且鬪爭萬馬風聲起沫塵散九天轟陳吞九地有石屹不驚日夜焉能砥鼉鼉怯盡逃行來波臣禮俛首落石前受約三門底三門阿誰名名之神人鬼後人總傷魂來往稀一葦莫謂架山梁五丁額亦泚縱有漢唐人堆崖紅生米新開寶篆文平陸黃炎址四載大禹勤元圭端在此踏足望樓頭歷歷見星嵬一壁四削成的的芙蓉蕊風搖草青青千年絕人履傳聞周老聃曾煉藥不死人從函谷遊賸有丹竈壘

從夫赴鴈門

董少玉

周弘
禴妻

鴈門西近邊一片黃沙地烽火夜連天角聲入雲際風月盡悲悽草木多憔悴况是逐臣妻那能不洒淚
國朝

小須彌

朱之俊

仰望北山腰煙雲嘗繚繞誰將巨靈斧鑿此懸崖杳石室嵌金容鐘聲自昏曉棧道垂空危紅欄絢木杪登頓未半途瞥見華幡裊始信諸天居不在空虛表層層繞須彌七寶光明瞭此地亦復然俯眎何縹緲珠樹列山阿應來三青鳥世界可粒藏莫謂須彌小

論晉中詩人懷天章

陳廷敬

摩詰秀千葉柳州儼天人義山最崛起流別自有真上下五百載遺山接清塵自餘諸作者海山羅奇珍嘗鼎分一臠已

山西通志 卷二百二十一
足甘喉脣鄙人老無學粉榆私所親豈惟鄉里賢名與天壤
新我初慕聖道矯首思河津緬維三千篇刪述垂千春大雅
久凋喪風流隨波淪昔者卜子夏論詩河之濱沿河溯洙泗
餘潤沾窮鱗文章寧小技矩矱存先民以茲慰衰晚奮翼攀
鳳麟既得金鵝子金鵝天章齋名刮眼辨玉珉子居玉溪上義山舊
卜鄰况復龍門峻岩堯臨高旻執鞭今所願參駕豈同倫虬
蟉與大樹天賦理則均撼之適足笑安分不失身扁舟阻千
里寸心無由申所期鄉國間詩教還清淳

秋日往石閭

捨策登險艱窈窕窮清秋溪流沙徑細草長荒陂幽日高臨
往路亭午陟遠邱舊居渺叢爾中有萬古憂返躬集悔吝閱
世紛愆尤遯跡心逾危憫俗行且休遊戲采芝藥芳序忽已
邁羨門不可卽徐生入海求仙者良冥漠塵埃難久留何得
奮翎翅遐舉陵滄洲

南樓見砥柱

樓外砥柱山几席浮青空神禹所表置高標天闕通王屋連
析城秀色摩蒼穹登樓遙見之懷古心憂忡二嶠秦壘滅三
川晉國雄蠻觸紛鬪爭役役會有窮渺然想開闢元化觀無
終

九女臺北黑龍潭

維南有金焦江間屹不動詎知砥柱東山起挾河縫河流兩
汭汭此山磬而控其北皆連峰排拶故縱送陟崖臨數仞潭
水鬱湏洞相傳是海眼仰口若大瓮鬼工施鑿成人力匪所
用俛視悸心魂危立仗廉從四山下驚風崩墜影與共取道

山西通志 卷二十一
青石叢出險衆聲哄此中龍潛棲禱雨屢則中古祠明月高
秋軒發幽夢囊中五絃琴改調一撫弄

六賢堂

下馬平潭驛訪古六賢堂淦陽政寬簡湧雲思煒煌文獻總
文炳楊趙齊輩行左司富才藻晚節猶芬芳欒城老封龍鑑
湖映末光四賢旣卓犖堪此一瓣香後益以王呂名蹟能禁
當山川景英哲祠宇成蒼涼士節古所重此道今凋傷荒城
鬱茂草倚徙悲殘陽

宿沁州懷吳銅川通政

凌晨涉野流哈呀入澗口林深長木魍埃古立土偶霜葉得
紅梨風條惜黃柳歲物森愴懷關山鬱回首地聞叔向賢邨
云徐勣後舊蹟渺猶存遺風嗇而厚懸崖人散居營窟老相

守華棖及鼎肉蕭然此安有仁里銅川子潔清吾所友夙歡
結同心離居念分手重爲京雒遊然諾應無負獨覺感異方
鄉心亂已久

與同年張伯行登樓講學

魏象樞

造化珍元氣大道傳真剛維持天壤間五行兼五常我年過
四十中夜多徬徨空質寡實力安得狷與狂知者誰爲言徒
使淚沾裳卓哉張廷尉鐘靈析山陽妙齡備中和長者心難
量指我知命說贈我守身方一字一藥石學豈在深藏有過
期共白片善渾相忘賴此至性人幾希免自戕嘗聞古儒者
三才藉匡襄樹德通萬類華國本天良君爲董仲舒日月饒
輝光余也愧薄劣泛泛逐巖廊屋漏不可欺六月懷冰霜

懸空寺訪僧同曹子步妹丈

山西通志 卷一百二十一
遙聞十里鐘在山忽在水盤折叩山門老僧閒如此巉巖綴
虛空石閣輕如紙携手說飛登白雲簷外止

登銅鞮山

吳澄

我愛銅鞮山獨立誠矯矯上有紫徑通下有清流遶我來陟
絕頂俯厭衆山小如何山下路一望耿未了

歲甲辰四月至六月不雨秋又大潦雲民飢懷仁縣諸
生于懷漢出家穀千石助賑詩以美之

曹溶

關外多石田五穀半不生七月飄嚴霜藝穫難滿籬遺民性
惰窳作苦終無成其初習邊俗逐堡屯戰兵年甫十六七便
出充壯丁坐糜官家糧狼戾嬉童嬰天運捷環轉效順來王
庭隘口貢騏驥戎備循其名尺籍十存一餉額無餘羸飽食

不常得農田始枝撐要術付鹵莽錢鏹辭堅精季秋未殺草
膏用徒星星雨暘順四序隴畝咸滋萌疾力上公賦八口猶
悲焯厄當龍蛇歲驕陽大流行赤土裂千里旋風捲空城暑
退忽淋漓滛潦不復晴漫山衝白沙石壓嘉苗莖泛泛宿水
中動側如浮萍二事實傷稼爛水尤涕零旱日種不入可待
明年耕今茲將吐穗并令牛種傾野哭連朝昏一兒換杯羹
市絕升斗粟駟僮留虛評倉儲雖有禁矯發甘官刑聊汲勺
水微沃彼狂燎橫偏方愧持節癘憂正怛怛義士奮山中不
遑振冠纓長跪迫致詞願達憐憫情灾屯喻剝膚蓄積良甚
輕問士獨何爲里黨我父兄父兄飢欲死微軀敢自寧縣令
坐堂上義士立前楹盡出室所有菽麥梁稻杭大村持橐來
小村提瓷罌平明至矐黑次第亦不爭各自歸土窟晚爨烟

山西通志 卷三十一
青熒全活累百族鬻子爲暫停義士心懽愉從此安柴荆琅
琅誦詩書蹇盡還致亨更祝蒼旻高露澤私邊氓螾螾深入
地蜡飲烹牢牲長吏職撫字桑乾揚潔清芳譽播京邑峻擢
公與卿雲州歌樂土永作邦國植我感義士心表幽古有經
列狀上史氏庶使末俗驚再拜執謙讓本不圖光榮輸財博
干進辱身同劓黥三晉有斯人陳風記昇平

望縣上忌坂作

王士禎

南望介休郭青山鬱相嚮爲問斯何山云是古縣上子推從
亡返託迹此巖嶂公子詎烏喙斯人自遐尙旣殊少伯逃復
異靈均放焚林良已奇抱樹或過當疇知志士心未易怙情
量誰代歌龍蛇其迹類有望棲隱儻不終懼爲高人謗田光
齒利劒瀨水沒清浪所貴明一心何能畏死喪嗟彼苟且人

浮沈詎爲曠

御書山林雲鶴四大字以賜范君彪西賦詩紀事

王士禎

往時文中子著說擬魯論黃頰白牛谿講道無虛轅寥寥千
載後先生藹鴻軒薪火遠相續絕學賴以存毫芒必辨晰刊
落歸本根宣髮照佇素霜林幾飛翻理學兩備考吾道屏與
藩明行揭曉景芳辭綴蘭蓀闢具有正軌紹聖無旁門書成
遣長鬚緘示徵余言謂嘗及昭代沿流溯其源投桃寓飲餞
如嘲一斗髡更味便面詩筆妙孤騰騫付屬殊有意雲龍難
追奔所多職事牽索索真氣昏何嘗策杖從清涼以滌煩迺
知薛收輩平生幸攀援報章謝不敏聊以志勿讓

大齊壽陽驛題韓文公詩後

山西通志 卷二十一
天寶昔喪亂宰干及阿鞞扇禍始漁陽流毒被河朔辛苦九
門戰堂堂李與郭滋蔓逮三鎮世守恣兇虐軍中立留後諸
藩擅官爵山東勁兵處縣官實自弱元和聖天子咨相授方
略淮蔡洎淄青次第就束縛移兵壓山東勢如掃秋籜遺恨
功未成殺機生魏博庭湊何么麼跳梁敢弗恪偉哉昌黎公
談笑狎巨鱷我行過壽陽遺詩緬猶昨韓愈殊可惜朝廷乃
大錯真卿與巢父茲事詎堪數誰與秉國成蛾眉竟謠詠杜
牧有罪言千秋實良藥

介山

驅車綿上聚懷古綿上田授璧事已遠遺跡今虛傳晉國昔
多難公子實大賢五蛇爲之輔一蛇獨耆乾身隱竟焉文狐
趙羞比肩逃榮誼固高報德理亦然徘徊望忌坂落日無寒

煙何人貪天功嗟哉南內年

送陳子文赴安邑四首

我愛田子方同時段干木高義動諸侯清風激頽俗聞鍾知
左高佳言足三復下車或式閭寧浼踞堂辱斯人邈已遠餘
韻留鄉曲賢哉魏成子千秋擅遐躅

峨峨中條山迢迢涑川汜人物表西河流風至今美陳侯東
海來高文一何綺閭闔籥浮雲負絕致千里自抱萬古心五
斗焉足恥滹沱冰上渡故關雪中啓懷古多遠情到官正春
水目送中條雲松風滌雙耳

騏驥服鹽車躑躅上虞坂山石何磽聲日暮途且遠道逢紵
衣惠未敢悲晚晚仰首奮長鳴而日思一展譬彼軼世士遭
時未離蹇君過虞坂上懷古向陵緬古之賢達人澄懷善舒

森森沆湘流香草日以蘭鬱鬱徂徠松百尺凌歲寒君子重
結交貞固期不刊解巾二十載閱世如波瀾苑枯旣以移素
心良獨難喬木隱窮巷饑禽噪簷間君偕辛齋叟時時造門
端告我媯汭行能不傷肺肝保此金石心在遠義亦安不見
蕭長倩錄錄曾抱關

十月十四日夜同曹使君雲州對月

朱彝尊

發軌自徂暑息鞅及元冥迢迢沙際月皎皎雲中明臯禽警
朔吹別葉辭苦莖青霜降北陸參井緬縱橫主人託嘉藻休
澣寡所營悟彼行役艱曲宴奏中誠清樽湛瑤席兔首亦以
烹但言音塵闕豈意良覲并謙謙君子柄習坎美不盈澄輝
矢相照慰我殷憂情

鴈門關

南登鴈門道騁望勾注巔山岡鬱參錯石棧紛鈎連度嶺風
漸微入關寒未捐層冰如玉龍萬丈來蜿蜒飛光一相射我
馬忽不前抗迹懷古人千載誠多賢邳都守長城烽火靜居
延劉琨發廣莫吟嘯扶風篇偉哉廣與牧勇略天下傳時來
英雄奮事去陵谷遷數子不可期勞歌爲誰宣嗷嗷中澤鴻
聆我慷慨言

宋烈女行

紅羅持作帕素練持作巾何必合衾幃始爲同心人宋氏有
女典生長蔚州之野西崖之山年紀十五餘許配千字村村
民蘭州廝大義結夫婦忽登泰山錄人壽不得久女方曬穀
聞之聲悲哀長跪告父母兒當從黃泉下信誓旦旦不可乖

山西通志 卷二十一
父母向女言尊章爾未事慎勿捐形軀相保親父子各各還
室中涕淚終不止月正三十日其日二十三白日從東來奄
忽墮西南闔門夜無人女向空庭坐攬我素練巾接彼紅羅
帕徘徊寢室旁自挂中門下父母啓視哽咽不得言觀者四
方至歎息日暮還童童喑嘯側乃有松柏林誰言寸草芟乃
有松栢心

英 宿小店憶忻州形勢書以遣悶

王 綬

兩山如覆孟衝當南北口州治居其中羣嶺皆拱樓廣袤百
餘里平行列田畝二河自北來交會注東走一河自南奔透
迤遵長阜旋復折而北抱城如曲肘通渠灌平田二河利彌
久碁布數小山體勢俱不苟南偏儼筆架高埃戴其首西北
一螺髻似侍州之後自茲西而北遠案州所有更北兩山異
映射如相偶其一頂平圓其一特峭叫勢與大山衡洪濛孰
爲剖天生山川奇變幻盡培塿吾非堪輿家詩以質吾友
過有道祠見公他書中郎舊誅歎美不已因紀以詩

吳 雯

繫馬古槐下槐花石堂偏誰書有道碑古法蛟龍纏其文中
郎舊書亦堪比肩嗟哉濁堂老縱橫照秋煙鴻都蹟久蕪幃
幕留殘鐫夏承誰呵護靈光猶巋然巍巍九疑頌託迹於神
仙此碑妙接武絕響續千年梁鵠鄙不爲頡籀或後先我來
重歎息典型欣目前坐臥欲三日苦被塵累牽上馬再回首
孤鵬方高騫

石壁

潘 耒

石壁不可尋滿谷春雲滃谷口一小峰亭亭秀而聳山腰磴

山西通志 卷一百二十一
道窄先登競餘勇側裂石嵌空倒垂樹擁腫稍稍晴雪飛浙
浙冰泉動禪居面蒼巖畫屏逼相拱甘露無仙壇白牛寡靈
種獨有夫人碑南金世爭重千佛鑄金爲象數何其冗有客
思洪爐佇見火雲涌干將截犀兕錢鏹耕邱壠曠觀世誰同
虛令龍象恐不如盡春醪藉眠草茸茸

宿靈泉院

白印謙

人說靈泉松夜夜明月光茲來非月夕清風生微涼上方一
燈懸衆象何荒唐靜坐無聽睹時聞薈蔔香

閏十一月游張坦之門嶮山砦

吳雯

縣南山絕奇巘岈列仙掌嘗恨煙火骨蹉跌在塵鞅雪陀經
世人獨抱箕穎想尋山造其奧結茅干仞上以我爲漁父誘
入桃花港所從盡豪異各具屐一兩雞鳴發桑林虎啼亂莽

蒼夾壁隘天光亭午依微晃蒙密升雲際危磴纔通丈數武
凡絜息僮御艱扶杖峰巒勢更變雲日相盤盪錯磨生空翠
倏忽名難強飛湍瀉幽壑淙淙激哀響層冰結水簾琅然映
鶴竚對此披胸懷智理紛觸長無怪朝山人一步一稽顙咫
尺天門豁竦峭儼屏幌王屋秀煙中砥柱矗相向苦竹洗寒
翠青草垂冬壤乃達岩壑盡犬聲出嶂嶙山月已娟娟徘徊
照深廣天明躡峰頂紅旭延清敞石隙綴孤梯如媠據兕象
半空河雒影影影在滉漾仙仙屋數椽位設何瀟爽長嘯立
青冥下界空攀仰松栢代烝薪芝苓充餽饌庶堅金石壽永
結無心賞揮手謝煩喧不獨干戈攘幽棲賴志氣願言荷崇
獎

萬山石門詩

山西通志 卷二百二十一
萬山奔一城石門當水口仰垂千仞壁清潭俯承日森然敞
雄界包緇此重厚緬自陶唐年鑿出神禹手稟靈人物萃過
續徒虛有竭來據斬巖風霜滌埃垢嶽峯萬古心傾寫寓杯
酒誰能隘六合獨後天地朽

題龍泉舊讀書處

憶昔棲名山日日賞空翠山寒常晏起聽泉夜不寐茲來憩
蘭若雲蘿增我媿無心天一君期結千秋契

初入石壁仝石道人作

白孕彩

澹紅一樹裏疑信是石壁取徑得刻秀雕岩倒平栢泉聲幽
壑深塔影立小白野橋更精神延佇忘苒息遲看高氏碑不
欲渡橋北引領望橋上滿壑秋容集

白城雜詩三首

溪魚方出遊魚梁截上流二寸至盈尺須臾數百頭漁子擇
雙鯉殷勤向我羞重違彼來意歸與阿華謀阿華不如葦提
携放清流

淵明曾乞食初願欲何之縱不至嘔蹴已覺拙言辭落英亦
可食刻意效貧兒王謝談門第誰堪賤辱爲
無食不衆聚無兵不自決壯士手搏人不如持寸鏡激發生
忠義山澤有豪傑漢高雖天授還資一彭越李密不背唐功
業未可沒齊賢策太原士雅欲北伐長揖綠林子歎語南唐
卒王霸有捷徑此輩宜深卹

東溝

韓 炎

夾澗三百家遠望如空谷陶復復陶穴稽籬代版築出沒妙
不測烏止於誰屋逞者避盜賊又日聚屬族過澗背鏡山美

山西通志 卷三十一
利倍種穀公劉昔好貨取鍛非今獨貨殖傳程卓未富亦可
逐

贈蒲州吳雯

韓 茨

大塊齊一指所好適萬族拙者謝所牽結念愛幽獨時步城
西寺逍遙獲良覲素心愜新賞寧豁娛心目徙倚長松下好
風迎謾謾投余青琅玕浩歌激林木太息念此身遽然爭世
覺世事覆醯鷄萬貌媚嗑喔苟得徒爾爲警警同哺敲咄嗟
法秋露其骨朽已速何當金石堅十年學無學實不是苦縣
又不溺身毒微言揭鄒魯有味如毀菽鏡子非青銅磨治含
中垢平生空負屬小技恥雕斲清詩發孤笑妙善倘商摧醜
翻予以灌滄浪我當濯千古有寸心此身足未足
雪中發陽城 趙執信

雪暗戍堞高遙見東嶺背城邊騎馬路寒水明朝靄颺驚鳥
不飛霧宿山多態路轉陟峰顛曠望一無礙前臨若無地岡
阜紛破碎迴視荒烟分適與城郭對人家儼鱗次雲水互掩
曖雞犬聒昏朝陰晴作明晦三日此中居風土佳可愛夜閣
火常溫高齋酒頻載長途冉冉去竚立心孔癡太息謂送人
勝事應難再

棲龍池

張泰交

大塊皆文章山水傳其妙所以古淵人窮年展清眺不險不
能奇登臨貴有要崔嵬橫嶺南千仞色同縹丹碧疊雲屏松
栢繪霞嶠懸巖莽回互危磴盤林杪瑤殿開雲根澗壑縈窈
窕其下有澄潭黝然深且杳云是蛟龍居石上羊腸遶滄溟
縮一盃洩則尾閭竅孤探足自怡歸路斜暉耀安得此中居

山西通志

卷一百二十一

年

家其雙松一影

馮雲驥

瀛洲有影木一葉具百影溶溶如列星靈光幻虛冥胡乃松
兩株而若蔭交併離披日月下繹繹成異境多寡詫珠懸今
古驚傳領奇根誰篤之物理不可省深巖杳蒼幹孤嶂抱綠
町悵然無從尋天風吹骨冷

凍水蛟冰

翟鳳翥

文水玉漣漪其中有異物每至冰堅時突作介而嘯錚錚霹
靂聲漸漸鱗甲鬣雨岍數十里冰揚水仍沸傳言戟化蛟往
來蟠屈伏董澤參龍池或是宮庭沕花樹躍明珠絳綃飛朱
紱去年龍劍臺時乘雷雨歛

泛月波湖

陸慶臻

清夜不知暑淡然疑高秋中庭來好風白月當軒流美人善
爲政退食百不憂撫景唱瓊論一唱還復酬終宴發興新結
伴城南遊衆賓肅聯袂一一皆枚鄒角聲起女墻麗譙報初
籌屏騎聊散步逸氣生道周雕弓四五輩前後夾兜鍪連朝
雨如酥平沙漲通溝行行一以止沙棠恣夷猶揮手泛之去
半篙放中洲水心送微涼水面煙未收主人愛佳酌雜坐陳
庶羞顧視所載酒相與洗玉舟澄暉照座隅攬之在帶鉤沿
洄遵枉渚波路緬何悠歛瞻浮圖迴千尺臨上游不知何朝
寺却對東南陬陬隅迺據勝繫艇稍逗遛透西山若拱翠微
出城頭城中萬人家參差間高樓槐榆栝栢柳蒼茫影沈浮
大勢趨巽維晚眺良已優茲地稱信美經營協人謀逝將建
黨塾勗哉髦士修兼令此邦庶歌祝寫其幽時平犬不吠靜

山西通志 卷一百一十一
聞擊柝稠明府恣在安能貽羣動休皎皎棲素禽一鳴水中
邱鳥雀警深樹亦或相啁啾俯見層湖陰跳沫漾輕儵仰視
燦列宿絡角斗與牛我欲弄明月天漢浩阻修羣公顧我笑
此景可再不迴舟方塘側束炬明我眸街卒傳虬箭嚴更且
三紉歸路宵氣沈薄寒侵衾裯詎翳晉陽地炎天消鬱攸清
飈吹塵垢君子有大猷

踰高山風雪擊面如刺因宿篩子坪衣毡乘輿積冰成
甲到寓扑冰解毡始得出輿慨然有作

汪宗魯

朔風嚴至此山行無一是毫髮總蝟縮盲風貫肌理縱不憚
行役其如僕御靡欲行埋車輪將馳沒馬耳如掌翻撲空封
山漫無紀未夕且告疲姑向邨茆止堅冰錮我樊乃至不可
起閉置寒帷坐扑打落如紙遑恤車中人從者恐墮指亟命
先火攻下策聊復爾顧影浮大白詰晨更前擬

望恒山

張韜

望恒山恒山不可上衆峙皆有兩北嶽爲之長石飛天與招
壁立龍行象曲陽靈所寓平觀羣偃仰瑤草帶雲來化作非
非想荷插遶天峰中虛聽清響梯石結空堦舉州多宿莽闢
異種奇因刈荆開獨往須彌納芥中泰山在吾掌古今千萬
年止此歷埃壤

和望恒山之作

徐化溥

愛恒山恒山真可上單峰巒無兩四岳讓雄長三千與大千
法中說龍象有窟飛安王巉巖不敢仰雲來蛇結陣石去鳥
有想昔年白蝙蝠哈嚙發空響得道臥山椒萬塵若奔莽雲

山西通志 卷二十一 藝文 全
白草青青若敖安所往烟嵐萬壑晴瞥見巨靈掌石室揀蘭
臺趙符瘞何壤

東山石室

王維藩

少陵奇石櫃閣立在層波我來尋石室山傍扶桑阿阿頂如
禿翁兩竅張雙瞳窘步從竅入蟄身縮蠶叢豁然晨光啓引
我造琳宮地中別有天結構若化工因憶倉頡塚藏書臺穹
窿茅茨土階時圖書陶穴中安知龍象窟非卽古三墳

借叶

似園幽興

王含光

南園春雨晴細草遶砌生灌木漸抽蕊雲鳩忽已鳴陂池生
新水水鳥何無聲掃榻山色下關簾道心生客來欣倒屣暢
此邱壑情蘭室促玉軫竹房敲楸枰園菽青堪摘家釀綠長

盈願勿談簪笏致渝鷗鷺盟

暮年多遜思買田王官谷卜宅當谷口聊構數椽屋門對天
柱峰牕挂千尺瀑仙靈委空蛻逋客遂初服高嶺披松杉深
巖藏橋榭峽逼疊溜鳴崖斷危石撲細路連棧橋曾巔走牧
犢場鹿隨客行野鳥衝人逐烏桺晚葉紅霜栗秋漿熟求友
逢漁樵見月坐林麓樂事復同人誰云媚幽獨

山游無遠近來往不可期著屐出村園杖竹相扶携循磴踏
亂石攀巖挽纖枝振衣層岡上衆山逞其姿煙林鬱綿杳宮
觀何參差危牕嵌絕壁飛泉灑流澌滴瀝結空翠寒陰絡細
糝登臺岫雲迎長嘯谷風追有酒疲可滌無絃情乃移夕陽
變峰影歸路應棲遲歎息千百載後來者爲誰

數巖麓臺龍洞帶盡寒色棘良入氣氣韻雲千陳祖法師谷

透迤入洞口衣帶盡寒色竦身入深邃亂雲千里黑四洞各
離奇儼然如分域北麓地最崇潛龍爲窟宅古木橫深澗危
梁俯空碧稍南聯二穴水乳交凝滴龍孫與潤濟據之司霖
澤東南更深宵腥風朝暮迫日沒萬鬼號雨來千弩集奔雷
與噴霧鴻濛終古闢茫然驚飛鳥何從振杖策緬想月止時
皎皎照寒栗猛將擁嬌娥新花附古栢

龍舟夜月

太行插青天枯樹來悲風客行哀清秋游覽多朦朦徑歷千
萬轉倏與清溪通峰峰不藏雲湧出青芙蓉女蘿飄蕙帶秋
響鳴山蟲寥寥天宇曠變化窮鴻濛月出動萬山羣象涵碧
空谿禽白如霜深入蘆花叢洞開玉女窻直入瑤池宮仙人
披髮嘯鸞鳳操絲桐白光搖寒烟萬里清無窮烏啼月漸落

倒映溪邊松我來落花晚蹠蹠騎青驄寸心寄幽遐何殊上
崆峒

誤載花石吟

李煥斗

昔讀方輿誌廣靈產花石及予官此方有客寄書覓殷勤詢
父老邈然無踪蹟因知古人書流傳多失實凡事貴闕疑不
獨茲一邑

藐姑射山

毛達

或言汾西縣舊有藐姑里玉人邈難求至今遺銅屣著之如
輕綿可以涉雲水延佇待雙鳧朝暮常徙倚
日出霍峰頭彩雲蟠其下光暉映城隅藐姑相照射恍惚見
仙人玉顏殊瀟灑醉倚白鹿肩縱橫同騎馬

